

ОМОН МУХТОР

АЁЛЛАР МАМЛАКАТИ ВА САЛТАНАТИ

Романлар ва ҳикоялар



«ШАРҚ» НАШРИЁТ-МАТБАА
КОНЦЕРНИНИНГ БОШ ТАҲРИРИЯТИ
ТОШКЕНТ — 1997

ФФУ

Ривоят-роман

(...Устида жанда, бошида кулоҳ — бир түп қаландарлар: «Ҳақ дүст, ё Оллоҳ!» — деганча бозорни айланиб, карвонсаройга бормай, түгри қабристонга бориб, тамадди қила бошлашди. Бирор, нега бундай қилдинглар, деб қизиққанида, улар кулишди:

— Ҳамманинг ҳам ахийри келадиган жойи шу...)

ОСТОНАДА СОЧИЛГАН САТРЛАР

Бу ёзганим барчаси — эски гап.
Биронта янги гап йўқ! Тополмайсиз.
Лекин сизни эски гаплар...
қизиқтирмайдими?!

Менинг отам (эски одам эдилар!) бир куни баридар
бир орқага қайтасан, дердилар.
Мен олдинга қараб югурап эдим...
Бу кун қайта бошладим.

Аслида, эгнимиздаги тўн, уйни безашимиз ажраби
турмаса, — бизнинг ота-боболардан фарқимиз
йўқ.

Бу кун янги бўлиб куринган дунё —
эртага эскира бошлайди.

Бу дунёга кимлар келиб-кетмаган:

*Жаранг-журунг,
жарант-журунг.
Қўм тепаларни оралаб,
Кўнгилда орзу-армонлар —
Олис уфқни қоралаб,
Судралиб борар карвонлар.
Жаранг-журунг,
жаранг-журунг.*

*Чарҳдек айланиб давронлар,
Чирмашиб гўё томонлар, —
Юрак-багрингни поралаб,
Бирдек судралар карвонлар.
Жаранг-журунг,
жаранг-журунг.*

*Ўтиб-тинган не буронлар,
Йулларда бўлган суронлар,
Бизга «бир четдан мўралаб»,
Судралар ҳамон қарвонлар.
Жаранг-журунг,
жаранг-журунг.*

Отам ўлганларида, ёnlаридан арзимаган уч-тўрт сўм пул чиқди. Қоғозга ўраб, ип билан боғланган.

Очиб қарадик. Бундай ёзув:

«Мени кўргани келган кимдир буни тушириб қолдирган. Топиб, топширинглар. Йишондим...»

*«Қорнимга йигламайман, қадримга йиглайман!»—
эскими, янгими, гапни одамлар ухшатади...*

Биз, умуман, йигламаймиз. Аммо:

*Йиглашга тўғри келса, сиз нимани деб йиглайсиз?!
Кулишга тўғри келса-чи?! Масалан?!*

Мен бирорни севмасам, китоб ёзармидим?!

Остонада овора қилмай, ичкарига бошлайвер, —
гапингни гапиравер чўзмасдан, дейсизми?!

Ха, албатта.

Демак...

Марҳамат!

* * *

Бир дўстимиз айтар эди:

«Ақлли бўлсан, нима қилай?!»

У узининг ақлли эканлигидан изтироб чекар ва завқланиб, ҳайратланарди.

Бошқа бир дўстимиз купинча бошини чайқаб, шундай дер эди:

«Мен ўз ақлимни бирорнинг калласига жойлаёлмайман!»

«Чучвара тувишдан мурод — гўшт ейиш!» — деган экан қайсиdir мутафаккир. Яъни, кимдир (қачондир) чиқиб, бутун халқни аҳмоқ қилгиси келган тақдирда ҳам, дунёда ақлли одамлар топилади.

(«Тарихда мисоллар жуда кўп бунга!»)

Худога шукр, бизда ҳеч ким халқни аҳмоқ қилишни ўйламайди. Ҳамма инсофли, диёнатли.... Аммо ба-рибир, ақлли одамлар учрайди.

Бу — минг йиллик ривоят шу одамлар тўгрисида!

АЛҚИССА...

Утган замонда, ўзимиз томонда, —
бир вилоят бор;
вилоят шаҳарларидан бирида —
катта бозор
(Шаҳрисабз бозорини эслайсизми, Фиждувон бозо-
риними?!) —

лекин, у
худди ҳовуз; чуқурликда жойлашган;
бу ерга атроф тепаликлардан
одамлар
тушиб келишар эди.

Бозор пайшанба ва якшанба кунлари айниқса гав-
жум,

қолган кунлар санжоброқ бўлар эди.

Бу ерда — Шарққа хос, —
анқонинг уругидан бўлак

ҳамма нарса сотилар эди. Ҳўл мева, қуруқ мева;
сомонми? — сомон, қозонми? — қозон; бешикчи,
пичоқчи, кулол, заргар, чегачи дўконлари; ниҳоят,
дарвозалар пинжида ёймачилар, атторлар...

Кунлардан бир куни:
мана, шу бозорни
шаҳар фуқароси, оддий қурувчи — Мулла Тошпў-
лат

тепаликда туриб, анча томоша қилди.

Унинг аниқ мўлжали йўқ. Уйда зерикиб, кўчага
чиқсан; нимадир олсам оларман, деб бозорга қараб
юраверган эди. Ү муайян қарорга келолмай, ахийри,
пастга энди.

Кун — чоршанбаи муродбахш. Кеч кира бошлаган;
бозорда одам саноқли эди.

Яқин дарвоздадан ичкарига кириб, ёймачилар ёнидан
үтиб кетаётганича, Мулла Тошпўлат бехос тўхтади.

Барча ёймачилардан четда, кўқон дўппини бошига
қийшиқ қўндириганчувак юзли бир киши эски пустак
устида ўтирас; унинг олдида сотадиган ҳеч вақо кў-
ринмас эди!

Мулла Тошпўлат, бу одам бозорда нима қилиб ўти-
рибди, деб ажабланди. Қиблага юз тутгани билан у
намоз ўқиётган ёки зикр тушаётганга уҳшамайди! Бозор
унақа жой ҳам эмас! Тиланчи, десанг, ёнида тўр-

vasi, тўпланган чаقا, кирланган сўм йўқ! Бунинг устига, «Худоё, раҳмат айла қул очиб омин деганларни!»— қабилида бирон калимани мингирлаётгани ҳам йўқ! Обрули савдогарлар сингари, — аксинча, — жиддий, кибор ўтирибди! Ҳаммадан қизиқ жойи, афтидан, ўз машгулоти билан банд кимсани эслатади!

Шуларни ўйлаб бир лаҳза тўхтаган Мулла Тошпӯлат, йўлида давом этиб, оз-моз мева-чева, кўк харид қилди. Кейин, бозордан чиқиб кетаётib, —

бояги одам қарисида
яна серрайди.

Ҳеч нарсага тушунолмаётганидан, энди беихтиёр
Мулла Тошпӯлат —
у ён ўтди, бу ён ўтди;
ассалому алайкум, деб курди;
хорманг, деб сурашган бўлди.

Бироқчувак юзли киши гудраниб, бошини иргашдан нарига ўтмади; Мулла Тошпӯлат билан гаплашишга негадир —
раббат билдирамади.

Мулла Тошпӯлат паришонланиб, тепаликка кутарилганича, уйига жунади.

ШУНДАН СҮНГ...

У бояги одамни уч-тўрт кун эслаб, ўйлаб юрди.

Кейин, жонига текканидан: «Эй менга шу сабил қолган эканми?! Кучадаги бирорвга ишим борми?! Бoshимга ураманми?!» — деб, ўз-ўзидан хафа булиб, дуч келганини эсламасликка, ўйламасликка қарор қилди.

Унутиши мумкин эди! Лекин, —
кейинги пайшанба куни бозорга бориб,
яна кўзи тушди...

Бозор қайнаган кунда ҳам, қўқон дўппили киши —

жиддий, кибор ўтирас; ўз машгулоти билан «банд» эди!

Мулла Тошпӯлат бу гал олдингидан баттар таажжубланиб, паришонланди.

Уйга қайтгач, қўр тўкиб ўтирган «савдогар»ни унтишга қанча уринмасин, унуголмади.

Бу одам бозорда нега ўтирибди, у нима сотаётган экан, деган гап Мулла Тошпӯлатнинг хаёлида айлангани-айланган эди!

Келаси ҳафта Мулла Тошпӯлат яна бозорга борди.

Душанба,
кейин, чоршанба қуни.
Кейин, жумай муборак...

У, ниҳоят эски пустак устида ўтирган зотга яқинлашиб, қадрдонлардек қўшқўллаб кўришди.

— Узр, биродар... Сиз бозорда нега бундай утирибсиз?! Нима сотяпсиз?! — деб дангал сўради.

— Инсон бозорга зарурат учун келади. Ноиложликдан! — деди «ёймачи» сал ўпкалантган оҳангда. Кейин, қўшиб қўйди: — Мен сотадиган нарсанинг сизга кераги йўқ!

Гап тутагандек эди.

Мулла Тошпўлат ўз саволларига жавоб олган, кўнгли ҳам тинчигандек эди.

Ортиқ индамай, «ёймачи»дан узоқлашди.

Аммо уйга қайтгач, бозордаги «ошна»сини ҳамон унутолмай, ўз-ўзидан норозилана бошлади. Хуноб бўла бошлади.

Бу одам нима сотаётган эканки, менга кераги йўқ, деган гап хаёлидан кетмас эди!

Мулла Тошпўлат кундан-кун баттар тажангланмоқда эди. Ахийри, унинг сабр-косаси тўлди.

У яна бозорга борди.

— Узр, албатта, биродар,— деди Мулла Тошпўлат.— Лекин, нима сотяпсиз, менга айтсангиз! Бўлмаса, мен тинчимайман. Сизни ҳам тинч қўймайман...

— Мен сотадиган нарсанинг сизга кераги йўқ! — деди «ёймачи» босиқлик билан. — Юз-кузингиздан кўриб турибман!

— Балки, менга керакдир?! Сиз қаёқдан биласиз! Хўп, менга керак бўлмаса, бола-чақамга... Айтинг! — қайсарланди Мулла Тошпўлат.

— Сиз барибир олмайсиз!

— Оламан! Хўш, гапираверинг.

— Ақлимни ярмини сотаман!

Мулла Тошпўлат, пустак устидаги зот қархисида чўк тушиб ўтирган эди; ўрнидан иргиб туриб кетди.

Умрида у, бундай мато бозорда сотилгани ёки харид қилинганини кўрган ҳам, эшитган ҳам эмасди!

Бир лаҳза саросималаниб-ташвишланди. Эзилди. Йўқ, кейин...

мен аввалдан соддалик қилибман, тушунмапман, бу одам телба экан, девона экан, деб ўйлаб, Мулла Тошпўлат этак силкиганча, бозорни тез тарқ этди.

Анча кун уйдан чиқмай ётди.

Назарида, энди бозорга боришига ҳам, рўй берган воқсани эслаб юришига ҳам эҳтиёж қолмаган эди!

Бироқ,
яна бўлмади...

ЧУЛИ ИРОҚ...

Мулла Тошпўлат дунёда куйган одам эди!

Унинг суюкли хотини вафот этган; икки қизини узатиб, у шаҳар этагидаги бир ҳовлида сўнгти йиллар теракдек бўй берган ўғли Тоштемир билан қолган эди...

Ҳар қандай ота, фарзандим менга ўхшасин, дейди.

Ҳар қандай фарзанд отага ўхшайди, албатта. Лекин...

Шундай кишилар борки, улар учун бу ўхшашлиқ муҳим аҳамиятга эга; баҳт. Ўхшамаслик фожиадир!

Дорбознинг ўғли дорбоз бўлмаса, у ўлади! Чупоннинг ўғли таёқни ташлаб қочса, дала-даштда «Чули ироқ» янграйди!

Мулла Тошпўлат бу тоифага кирмаса ҳамки, шунга яқин; унинг етти пушти «отасининг боласи» бўлиб келган эди. Бошқача бўлиши мумкинлигини тасаввур қилолмас эди!

Булар — қурувчилар сулоласи; шунчаки қурувчи эмас, қўли гул усталар эди. Одатда, фарзандлар, қариндошлар, синашта шогирдлар уста атрофида дастага бирикиб, иморатни кутаришдан ойнакорлик, нақшкорликкача — барча ишни бажаришар, бутун бинони кўлдан чиқаришар эди.

Мулла Тошпўлат — олдин падари бузруквори қошида, кейин эса ўзи даста тузиб, умрини шу тахлит ўтказган эди. Лекин у ёши олтмишга бориб-бормай чарчаган, бунинг устига, ёшлигида бармоқларини соувукقا олдирганидан, қўли ишга ҳам яроқсиз ҳолга тушган эди. Мана, энди шогирдлари баъзан даврага тортиб туришларига қарамай, унинг бирон ишни эплашига ишончи кам эди.

Ота-боболари сингари ўғлига умид боғлаган Мулла Тошпўлат, аввалдан ўғлинни ўз ўйлига бошлаган эди. Болалиқдан даврага қўшиб, ҳунар ўргатиш, тарбия беришга уринган эди! Бироқ...

— асов отнинг тизгини қачон, қандай қўлидан чиқиб кетганини у билмай қолди! Бола улгайган сайин бошқа кўчага қараб йўл олган эди.

Йўқ, уларнинг муносабатини ёмон, деб бўлмасди.
Мулла Тошпўлатнинг ҳамон жон-жигари — ўғли; ик-
ки кўзи — ўғли эди! Тоштемир ҳам отасини бошида
кўтариб юришга ҳаракат қиласа эди! Хонадонда — қиз-
ларнинг гоҳида келиб, меҳрибонлик кўрсатишларини
айтмаганда, — аёл қўли етмаганидан, қозон осищми,
кир ювищми?! — бу насибани ота-бала баҳам кўри-
шар эди. Ҳарҳолда, улар уйни: «Супурги тегмаган хо-
нумон ҳароб!» — деган кўйга солишмаган эди! Уму-
ман, бир-бирига суюниб, тотув-аҳил яшашар эди.

Шунинг баробарида, отаси изидан Тоштемир уста-
чиликдан қўлини тортган эди!

Хўп, отангта қанчалик оғир эканлигини билмап-
сан, қурувчиликка қизиқмасан, майли — отанг
улганни кунидан шунисига ҳам рози! — дунёда ҳу-
нар кўп, биронтасини танла! Бу бўлмаса, тижорат
билин шугуллан! Бу ҳам бўлмаса, ўқиб, муллаларга
эрғаш... Бозорга бориб, мардикорлик қил, ҳаммоллик
қил...

Даҳшатли жойи шундаки, дунёда Тоштемирнинг
кўнгли бор —

ишининг ўзи йўқ эди!

Фақат бу эмас,

унинг қони-жонида

ҳафсалами-иштиёқ; тирик бадандаги рух —

Ҳаёт Ишқи аталмиш туйғунинг ўзи

йўқ эди!

Дарвеш-қаландар! — уззу-кун

кўча-кўйда судралиб юрап эди.

Уйда ҳам

соатлаб бир нуқтага тикилиб ўтиради.

На мақсад, на дард...

ҚУРУҚ СҮМБАТ!

Мулла Тошпўлат ўғли тўгрисида ўйлаб, изтироб
чекар эди.

У тушунмас эди... Нега бундай бўлди?!

Болага ёшлигида онадан айрилиб, она меҳрига
тўймай ўсгани таъсир қилдими?! Ёки, Мулла Тошпў-
латнинг ўзи ўғлига яхши тарбия бера олмадими?!

Ҳамманинг фарзанди аввалдан-охир ёнида туради.
Пинжига киради; гаҳ деса, қўлига қўнади... Мулла
Тошпўлат нима гуноҳ қилган, қандай қарғишига қол-
ган эканки, итга ҳам, битга ҳам буюрган шу оддий
неъматдан мосуво юрибди?! Ота-боболари — етти
пушти ичидан ҳеч кимнинг бошига тушмаган савдо,

келиб-келиб, унинг бошига тушди?! Мустаҳкам ҳалқа узилди?!

Шундай бўлиши шартмиди?!

Мулла Тошпўлатни бу ўйлар тун-кун эговлар эди...

Лекин — Мулла Тошпўлат ақлли одам эди! Фамандуҳга ботиб, кўксини ерга бериб ётищдан фойда йўқлигини ҳис этар эди. У меҳрибонлик, босиқлик билан ўелини йўлга солиш устида бош қотирарди. Баъзан, ўғлим ҳали ниҳол, қаёққа қайирса, қайрилади, деб янгидан умидланар; баъзан боламнинг ҳаёти олдинда, йўл бошида турибди, ким булади-ю, қаерга боради, деб ташвишланар эди.

Мулла Тошпўлат ўғлига бот-бот панд-насиҳат қиласар эди. Бироқ ГАПнинг ўзи —

Тоштемирнинг бир қулогидан кириб, иккинчисидан чиқадими ёки умуман, калласига кирмайдими?! — айтиш қийин эди. Бунинг устига, болалиқда бийронхушзабон бўлган Тоштемир энди тилини йўқотгандек эди... Мулла Тошпўлат фақат олтита сўзни билган, шароитга қараб, уларни ишлатган бир одам тўғрисида эшитган эди! Тоштемир ўша одамдан ҳам ўтказган — атиги учта сўзни, сўз ҳам эмас, нидони қайтаришга одатланган эди. У нимадандир мамнун бўлса «Оҳ-оҳ!» дер, ажабланса «Ий-й!» деб қуяр, норозиланса «Фу!» дер эди... Ўғли билан сухбатдан одамдек баҳра ололмагани — Мулла Тошпўлатни, айниқса, қийнар эди...

Мулла Тошпўлат бозорни этак силкиб тарк этганидан кейин ҳам, эски пўстак устида ўтирган «ошна»сini унутмагани;

бозор унинг хаёлидан кетмаганига —

боис шу

эди!

Бошига қўқон дўппини қийшиқ қўндирганчувак юзли зот бекорга бозорда ўтирганандир; бу ерда бир ҳикмат бор! — деб ўйлаб,

Мулла Тошпўлат яна беихтиёр тинчини йўқотган эди.

Қолаверса, у ўғли борасида
қисинмай дардлашадиган
бир одамга муҳтоҷ эди!

Дастлаб

унинг иши юришмади...

Душанба куни бозорга борди.

Кейин, чоршанба.

Кейин, жумай муборак.

Кейин,

пайшанба, якшанба кунлари ҳам борди.

Бозорда, дарвоза пинжида тизилган ёймачилар қаторида

кўр тўкиб ўтирган «савдогар» куринмас эди!

Мулла Тошпўлат ёймачилардан

«ошна»сини сўраб-сурисхандирди.

Эзмароқ биттаси «ахборот» берди:

— Бу киши гоҳ ойлаб куринмай ҳам кетаверадилар. Касал бўлсалар керак... Олим одам. Олдинлар китоб сотардилар. Ҳозир нима сотадилар, билмайман...

«У телбами-девонами!» — деган фикр Мулла Тошпўлатнинг кўнгли бир четида ҳамон сақланган эди! «Ахборот»ни тинглаб, ўз-ўзидан хижолат чеккандек, терга ботди.

Унга Эзма тушунтириди:

эски пўстак устида ўтирадиган «ёймачи»нинг исми Хайдар Махсум экан! Унинг ҳам ҳовлиси шаҳар этағида. Лекин Мулла Тошпўлатнинг уйи Машриқ томонда бўлса, уники Мағриб томонда экан...

«Ошна»сини йўқотиб қўйган Мулла Тошпўлат, уйига борсаммикин, деб ҳам уйлади. Истиҳола қилди! Ноқулай... Бирор ишонмаслиги мумкин, аммо: «Ошнам ўз матоини сотиб, кетган бўлса-чи?!» — деган хаёлдан Мулла Тошпўлат энди безовталана бошлаган эди!

Орадан роппа-роса бир ой утгач, у

Хайдар Махсумни топди.

Хайдар Махсум бозорда аввалги алпозда — жиддий, кибор ўтирас эди.

Мулла Тошпўлат суюниб-ҳовлиқиб, «ошна»си бағрига отилди. «Ошна»сининг ёнига, пўстакка қўнди.

Улар шунчаки савдо қилиш эмас, қизгин суҳбатга тушиб кетишган эди...

Бу суҳбат бизнинг зукко одамларга

галати-эриш туюлар; бироқ

олдинги замон, ўзимиз томон учун у —

оддий, табиий эди!

Сұхбат бундай бошланди...

Мулла Тошпұлат:

— Күрінмайсиз, биродар, — деди. — Қаёқларда юрибсиз?! — деди. — Эчки тепдими?!

— Рух йұқ, ҳол йұқ, — деди Ҳайдар Махсум. — Атрофға қарамайсизми?! Дунёда ҳозир ақлни бозори касод. Ҳаммаеқ дабдала! Бир ярим йилдан буён ярим-тагина ақлни сотолмай утирибман! Нимасини сұрайсиз?!

— Хұп, мен сиздан оламан, дедим, оламан. Гапим гап! Лекин мен үқимаганман; күп нарсаны билмайман. Сиз менга тушунтириңг... Масалан, нега ярим ақлингизни сотмоқчисиз?!

— Яримтаси үзимга етади! Ортиғи ортиқ экан! Фойдаси тегмагач... Ҳамма ерда ишлатаувериб, чарчадим!

— Мен уни сиздан қандай оламан?! — сұради Мулла Тошпұлат. — Үзимга эмас, үғлимга керак... Ҳеч эс кирмаяпты! Сояға үхшаб юрибди! Мени хона-вайрон қиляпты!

— Олиш осон! Қиблага қараб утирибман, — деди Ҳайдар Махсум. — Менда шундай салохият бор. Құ-лимини очиб, юзимга тортсам бас, ақлимни ярми үғ-лингизга үтиб кетади!

Шундан кейин...

бозор — барибир, бозор экан,

савдолашмай бұлмас экан! —

улар ҳисоб-китобға күчишди.

— Мен билишим керак, — деди Мулла Тошпұлат. — Сотадиган матоингиз янгими ёки эскими?! Кичикми ёки каттароқми?! Оғирми, енгилми?! Менинг боламга тұғри келадими?!

— Катта, лекин оғир эмас! Эски, лекин янгидан яхши. Ишлаб турибди! Үғлингиз хурсанд бұлади, — деди Ҳайдар Махсум.

— Менга қимматлик қымасмикан?! Қурбим етар-микан?!

— Қиммат эмас! Бунақа нарса учун сув текин... Икки минг танга!

— Икки минг күп! Күрмай туриб, оляпман... Минг!

— Минг етмайди! Бошқа сотадиган нарса топгунча бозорға келмайман. Рұзғорни тебратиш қийин...

Униси у деса,

буниси бу деди;
талашиб-тортишиб, ахийри,
Мулла Тошпӯлат —
Ҳайдар Махсумни бир ярим мингга кўндириди.
Ҳайдар Махсум бор барака, деб қўлини очди.
Алланималарни пичирлаб,
юзига фотиха тортди.
Мулла Тошпӯлат бир ярим минг тангани
қуртдек санаб, пўстак устига ташлади.

2

МУЛЛА ТОШПЎЛАТ...

Унинг кўнглида
Ҳайдар Махсумга қизиқиб,
танишиб қолганидан ҳам,
ниҳоят,
орани очиқ қилганидан ҳам —
ўкинч — пушаймонлик йўқ эди!
Дўппи тор келганда,
қадимдан одамлар
фўлбинга боради. Дуюхонга учрайди.
Йхлосу халос, дейди. Бу ҳам бир гап, дейди.
Мулла Тошпӯлатнинг Ҳайдар Махсумга гирдикапа-
лак бўлгани — аслида, шунга уҳшаган бир ҳол эди!
Сўнгти пайтларда у истаган кишидан вавъз эши-
тиш, ўглининг бошидан етти қатла ўгириб, садақа
қилишга тайёр эди! Унга, афтидан, Худонинг ўзи
Ҳайдар Махсумни йўлиқтирган эди!
Шу билан биргага...
Мулла Тошпӯлат
умрини анқайиб ўтказган эмасди;
ақлли одам эди!
У ўзини-ўзи алдагандек,
бунинг устига,
бозорда алдангандек
ҳолатни ҳис этмоқда эди!
Қандай бўлмасин,
Ҳайдар Махсумга «ёпишиб» олганидан
бирон натижа чиқишига — Мулла Тошпӯлат, —
шубҳа-гумон қилмоқда эди!
Ҳайдар Махсум тўгрисида «телбами-девонами!» —
деган фикр, шунча қуюқ-суюқ муомаладан кейин ҳам,

барибир, Мулла Тошпўлатнинг кўнгли бир четида беркиниб қолавергандек эди!

Аммо шу кунлар кутилмаганда...
у, Худоё тавба, деб
ёқасини ушлади.

Гап шундаки...
уша — Мулла Тошпўлат бозордан «ошна»сини то-
пиб қайтган куни

кечга томон
ота-бала
ҳовлида чой ичиб утиришар эди.

Қаёқдандир пайдо бўлган бир тўти
дараҳтлар, гулзорни қўйиб,
супада хиромон айлана бошлади.

Ганг бўйидан келганми, Нил бўйиданми?! —
тўтининг патлари камалакдек рангин;
ниҳоятда чиройли эди!

Мулла Тошпўлат ажабланиб қараб турган эди...
бундай паллада, нари борса, «Оҳ-оҳ!» ёки «Ий-й!»
дейдиган Тоштемирга бехосдан
тил битди:

— Анавини, дада... Катта бир уйинг бўлса. Са-
ройдек! Шифтнинг тўрт бурчагига шунақасидан қа-
фасга солиб, осиб қўйсан!

Бу ҳаммаси ҳали ҳолва экан...
Тўти супада бир оз айлангач,
хуркигандек учди ва —
нақ Тоштемирнинг кифтига қанотини теккизган-
ча, боши устидан ўтиб, қайтиб қаёққадир
гойиб бўлди.

Тоштемир эса эски одатича, энди негадир «Ффу!»
деб қўйди.

Шундан кейин...

Мулла Тошпўлатнинг хотини вафот этганидан
буён у — ҳовлидаги бир уйда, ўғли — иккинчи уйда
ётуб туришар эди.

Туни бўйи
Тоштемирнинг хонасида фонус учмади.

Мулла Тошпўлат бу ёққа ағдарилди, у ёққа ағда-
рилди, ахийри, хаёли қочиб,

ўғлининг ёнига борди:

— Ухламаяпсизми, ўглим?!

— Бошим оғрияпти... ана, шу ери, дада! Қаттиқ

оғрияпти...

Эртаси куни ҳам,

индини ҳам

Тоштемирни бош оғриғи қўйиб юбормади.

Мулла Тошпўлат эсхонаси чиқиб,
овсарланиб қолган эди.

«Бирор чилдирма чалса, уйинга тушибсан, майли.
Болани уйинга солиб нима қиласдинг?! Ақл билан,
бош билан ҳазиллашиб бўлар эканми?! Келиб-келиб,
фарзандинг бошини кимгадир тиқиширасанми, гал-
варс?»

Мулла Тошпўлат
уз-узини шундай бурдаламоқда,
жоҳил, ёвуз ота деб
бilmоқда эди!

У ўғлини табига кўрсатишни уйлади. Лекин қи-
синди! Бўлган воқеани қандай тушунтириб, Тоште-
мирнинг юзига қайси кўз билан қарайди?!

У, Ҳайдар Махсумнинг уйига қидириб бориб, «Ма-
тоинг бошингда қолсин! Менга боламнинг боши
азиз!» — дейишни ҳам уйлади. Лекин Ҳайдар Махсум-
га бундай муомала қилишга ҳам унинг журъати етмас
эди!

Учинчи кун деганда —
Худога шукр! —
Тоштемир енгил тортди.
Боши оғриши тұхтади.
Онадан янги түғилғандек,
юз, күзлари порлар, нур инган эди!
Тузалганидан сўнг, Тоштемир
бир куни эрталаб кўчага чиқиб кетиб,
кечқурун
илжайиб қайтди.

— Мен уйлаб курдим. Ишламаса бўлмас экан, да-
да, — деди у. — Усталар билан гаплашдим. Қурувчи-
лик яхши экан...

Шу кундан эътиборан, Тоштемир
боши билан ишга шўнгиди.
Аввалига бошқа усталарга қўшилиб юрди.
Кейин, узи даста тузди.
Одамларга уй қуриб бериш биробарида, Тоште-
мир —
ховли олдидаги майдончада ўзлари учун ҳам
дабдабали бир иморат тиклай бошлади...
Ўғлига эс кирганидан Мулла Тошпўлат хурсанд
эди.

Тоштемирнинг болалик пайтларидаги сингари

бийрон-хушзабон булиб қолганини кўрмайсизми! Энди деярли «Оҳ-оҳ!» ёки «Ий-й!» демайди. Мамнунлиги, ажабланганини ошкор билдиради! Фақат...

«Фу!» — дейиш эси йўқлардан ҳам кўпроқ ақлли одамларга хос, ақллилик белгиси эканми?!— Тоштемир ҳамон баъзан «Фу!» деб қўяр эди.

Мулла Тошпўлат ўғлининг гайратга миниб, терлаб-пишиб ишлаётганидан, айниқса, терисига сигмай суюнар эди! Лекин:

Тоштемир, у бошлиқ дастада кўринган бир хислат...

улар ўзларига яхши, кўркам иморатлар тиклашар, бошқалар учун қурган бинолари аксар арzon, қандайдир омонат, алфасона эди!

Бундан Мулла Тошпўлат паришенланиб, гоҳ-гоҳида

кўнгли ғаш тортар эди!

У ҳали, ҳайрат ичида, —

Худоё тавба, деб

еқасини ушлаган эди, холос...

Ўғли ҳаётида қандай ўзгариш рўй берганини англаб етмаган эди!

ТОШТЕМИР — БИР...

Энди гапни Тоштемирдан эшитинг.

У, дунёда кўз очиб, она эркалашларини кўрган, онасига қаттиқ меҳр қўйган эди.

Онаси вафот этганида, бошига тўқмоқ билан ургандек ҳолатга тушган; уша зарбадан гангид юрган эди!

Отасининг орзу-умиди нима?! Отаси нега дабдуруст бозорга серқатнов булиб қолди?! —

бу ҳақда Тоштемир ақалли ўйлаб ҳам кўрмаган эди!

Ота-бала

кечга томон ҳовлида чой ичиб ўтириб,

супада тўти пайдо бўлганида,

у меҳрибон онажонини эслади...

Онасининг қушлар, айниқса, шоҳлар қасри-саройида гоҳ қафасда, гоҳ эркин яшаган тўтилар ҳақида айтган эртаклари хаёлидан кечди!

Тоштемирниңг кўнгли бузилиб, киприклари намланди.

Биринчи галда, у, отанг Мулла Тошпўлат ҳам,

онанг Зулфизар биби ҳам энди мана, шу — отанг, қариган чогида хор қилиб қўймаслигинг керак, деб ўйлади.

Кейин, инсон ҳам шундай гўзал бир қуш; фарқи — уни қафасга соладиган ҳам, эркинликка чиқараладиган ҳам унинг ўзи; биқиниб-ётиб, отангни кучаларда саргардон судратган сен эмасми, деган хаёлга борди.

Дафъатан, менинг уша эртаклардаги шоҳлардан камлик жойим борми?! Тиришиб-курашиб, бемалол шоҳликни қўлга киритиш, шоҳона яшаш мумкин! — деган фикр Тоштемирнинг миясига чақмоқдек урилди. Ҳар одамнинг ичидаги шоҳ! Қийинчиликдан қўрқ масанг, чекинмасанг бас!

Тоштемир энди дадилланиб,
ўзининг ҳашаматли қасри-саройда
масрур, кибор юргани,
отасининг етти қават кўрпача устида ялпайиб
ўтирганини

тасаввур қилди!

Шу пайт тўти боши устидан учиб ўтди.
У беписандлик билан «Ффу!» деб қўйди.
Ўйга кириб, фонусни ёқди.

Торгина хонада нари-бери одимлай бошлади.

Баёнсиз бир нотинчлик —
вужудини қамраган;
айни сонияда —

миясини кимдир аёвсиз пармаламоқда эди.

Кўп ўтмай,
тинкаси куриб,
дераза олдиғаги ўринга чўзилди.
Чўяндек оғирлашган — бошини
кўтаролмай қолди!

Ўзи нима бўляпти?! — Тоштемир тушунмаётган
эди.

Бирдан тоби қочганига у ажабланмоқда,
бу унга зўриқиб ўйлагани оқибати бўлиб туюлмоқ-
да эди!

Туни буйи ухлаёлмади.
Эртаси куни ҳам, индини ҳам
тўшакда тўлғаниб чиқди.
Умрида бундай
азобланмаган эди!

Шу кунлар
жонидан бўлак нарса кўзига кўринмаётган эди!

Аммо тузалиб,
кучага йўл олгач...
«Менинг шоҳлардан қамлик жойим йўқ!
Мен ҳам шоҳ бўлмоқчиман!»
Уни — бундан буён, — миясига урнашган фикрдан
қайтара оладиган
бирон куч, фармойиши
топиладиганга ўхшамас эди!

У йўлида учраган ҳар қандай тўсиқ-деворни
чиғиртқадек талаб,
яъжуж-маъжуж сингари ялаб —
илдам урмалаб кетаверадиган
кайфиятда эди!

Шу билан бирга,
бунга зид ҳолда, Тоштемир узи тўгрисида —

ИНСОН! — ўзини қафасдан эркинликка чи-
қараётган қуш! — деб ўйламоқда эди! Унга тутган
йули — мўлжаллаган иши чиройли бўлиб кўринмок-
да эди!

У ишни одамлар орасига киришдан бошлишга қарор
қилган эди.

Шоҳ бўлиш учун биринчи навбатда:

1. Қасри-сарой тиклаши керак.
2. Атрофига одам тўплаши керак.

Тоштемир қурувчи-усталарга учраб, аввалига
ҳар хил дасталар билан танишди.

Кейин, узи даста тузди.

Одатда, беш-олтига қурувчи бир дастага бирики-
шар эди.

Тоштемир эса қирқта йигитни йигиб,
туртга гуруҳга бўлди.

Ҳар гуруҳга ўнбоши тайинлаб,
узи дастанинг бошида қолди.

Улар уч-тўрт йил бирорвлар учун ҳам, ўзлари учун
ҳам ишлаб, устачилик қилишгач, Тоштемир даврани
кенгайтиришга тушди; бошқа дасталарнинг йулини
кеса бошлиди. Кўп утмай, шаҳарда, кейин бутун ви-
лоятда барча қурувчилар бўйсунган Биргина Даста —
Тоштемир деган Бир Мушт пайдо булди!

Мана, у атрофига одам тўплаган;
ӯзига қасри-сарой ҳам тиклаган эди.

Отаси Мулла Тошпўлатни катта бир хона тўрига,
етти қават кўрпача устига ўтқизган эди.

Янада каттароқ хона шифтининг тўрт бурчагига

патлари камалакдек рангин түти солинган қафаслар осиб қўйилган эди.

Тоштемирга қуллар, чўрилар хизмат қилишарди.

Усталар жами уни Оқсоқол, Ҳужайин деб билишар, унга Пирдек сигиниб, кўрқиб қараашар эди...

Тоштемир шахсан устачилик билан шугуланишига эҳтиёж қолмаган эди! Лекин у ҳамон қурувчилар орасида куймаланиб юрар эди... Унга энди шоҳликни қўлга киритиш, шоҳона яшаш учун эришган даражаси кам бўлиб туюлмоқда эди!

Орадан маълум муддат ўтгач, Тоштемир

сартарошдан ямоқчигача шаҳар, вилоятдаги турли ҳунармандларни гуруҳ-гуруҳга ажратиб, ишчан йигитлардан ўнбоши, юзбоши белгилаб, уларни ҳам ўша — Биргина Дастага бўйсундира бошлади!

Лекин бу ҳам — унинг назарида, — ҳали кам эди...

У шаҳар ташқарисидаги бир горни танлаб, молмулк, аскар тўплай бошлади!

Ҳаётида ҳеч бир ўзгариш рўй бермагандек, — ҳамон қурувчилар орасида уймалашиб юрар эди.

Аммо вилоятда отнинг қашқасидек, кундан-кунга унинг номи чиққан, ҳаммаёққа овозаси кетган эди.

Минг хил
миш-миш:

— Тоштемир бойваччани эшитгандирсиз?! Шоҳда ҳам бунча тилла йўқ; шунақа битган, дейишиади!

— Отаси оддий одам. Лекин она томондан бир томири эски хонларга бориб тақалармиш!

— Шоҳни тўнтариб ташлаб, таҳтга минмоқчи эмиш!

— Ўзи ҳақда гапиришларини ёқтирмасмиш. Биродарлар, қўйинглар, балодан нари!

* * *

...Бу ҳикоя билан танишаётуб,
кимдир ўйлаши мумкин:

— Тоштемир озгина давр ичида одамлар унинг оғзига қарайдиган, ҳайиқадиган даражага қандай эришди?!

— Халқни бўйсундириб, йўлга солиш шунчалик осон эканми?!

— Наҳотки, бирор унга ҳов тұхта, бола, демаган бұлса?! Қаршилик күрсатмаган бұлса?!

— Ұша пайтларда шаҳар бедарвоза эканми?!

Әнг аввал...

шундай латифа бор:

Қадимда бир ҳукмдор

синаш учун оломонни майдонга тұплабди.

Ярим мурожаат, ярим буйруқ оҳангиди:

— Яқин кунларда ер-сувларингни тортиб олишга тұғри келади! — дебди.

Оломон индамай уй-уйига тарқалибди.

Уч-тұрт кундан кейин ҳукмдор

яна оломонни тұплабди:

— Бундан буен әр-хотин ҳамманг битта күрпа ичида ётасанлар!

Оломон бу гал ҳам индамай уй-уйига жұнабди.

Ҳукмдор бұғилиб, күп үтмай

одамларни яна тұплабди:

— Эртага ана шу майдонда ҳаммангни осаман!

Таажжубки, оломон одатдагидек индамай тарқалаётган әмиш! Фақат биргина киши ботиниб-ботинмай ҳукмдорға юзланибди:

— Онхазрат... арқонни үзимиз келтирайликоми ёки беришадими?!

Тарих бүйи

умри қулликда үтган одамлар — шу!

Халқ — шу!

Бунинг устига...

Билмадимки,

бу жаҳон фоний-у, кажрафтор экан,

Яхшилар

доим ёмоннинг ҳожатига зор экан! —

Тоштемир күпчиликнинг күнглини топған,

барча ҳунармандларга шарт қойған әди:

«Менга бүйсуниб, нақдина берсанглар, сенларни ҳимоя қыламан. Үгри ҳам, миршаб ҳам тегмайди! Үз билгингларча ишлаб, тинч яшаб юраверасанлар!»

Қолаверса...

дүнеда ё зар, ё зүр!

Тоштемир тез орада зарга эга бўлган әди.

У — зўр ҳам әди. Билагида тоғни талқон қиласидиган куч. Айниқса, унинг хизматида қирқта йигит бел боғлаган; қаршилик кўрсатганинг белини синдиришар әди.

(«Кимки бизга қарши турса,
Шартта-шартта отамиз!» —
деган шеър ўша замонда түқилғанми, кейинми?! —
Тоштемирга тегишли эди.)

* * *

Дарвоқе...
одамлар оғзидаги миш-мислар-у,
шаҳар ташқарисидаги горда мол-мулк, аскар түп-
лаётганига қарамай, —
Тоштемир ашвалдан мамлакатда шоҳ бўлишни кўз-
да тутмаган;
унга тожу тахтнинг кераги йўқ эди!
Бу пайтга келиб,
у маълум гурух устидан бус-бутун ҳукмронлик қил-
моқда;
ўзи истаган шоҳликни қўлга киритиб,
шоҳона яшамоқда эди!
Бироқ
ошиги олчи Тоштемир —
ўзини лоқайд-бепарво тутиб, қанчалик четлаб
утишга уринмасин,
барибир
(шаҳар бедарвоза эмас экан!) —
уч киши унинг бораётган йўлида тортган
деворга тўқнаш келган;
уларнинг қаршилигини снголмаган! —
енголмаётган
эди!
Булар:

1. Унга болаликда иш ўргатган — Уста Маҳмуд.
2. Мамлакат шоҳи.
3. Отаси Мулла Тошпулат.

Тоштемир бир кунлар,
ўзи танлаган йўлда —
хамирдан қил сугургандек, —
иши енгил кўчиб кетаверишини кутган эди.
У, пичогим мой устида; бирор пинагимни буз-
майди, пишагимни (мушугимни) пишт демайди;
ҳамма — мисол учун:
«Ишинг тушса, кичикни ҳам ака дейсан, кучукни ҳам!» — қабилида тутумга келади, амал қиласи! —
деб ўйлаган,

шундай булишига
ишонган эди!
Унга кимдир халал бериши,
унинг манфаатига зид юришига —
Тоштемирнинг ақли бовар қилмас;
у тинч қараб туролмас, —
чидаёлмас эди!

Шу боисдан, Уста Маҳмудни у нега эл қилолмагани-ю, орада рақобат туғилганига тушунолмай, асабийлашарди. Тоштемирга, бутун чигаллик Уста Маҳмуддан бошлангандек туюлиб, эзилар; баъзан тиф дамида юргандек ҳолатни ҳис этар эди.

У, вақтида
Уста Маҳмудни —
уз отасидан кам ардоқламас эди!
Уста Маҳмуд ҳам, ўшандা
уни —
уз ўғли ўрнида кўрар эди!
Уста Маҳмуд —
Мулла Тошпӯлатга
дўст-қадрдон эди.
Мулла Тошпӯлат, дастадан кетиб, ишга ярамай
қолганини билдирамай,
акам, устозим, деб қўллаган ҳам,
Тоштемирнинг қўлига appa-теша тутқазиб,
уни йўлга йўллаган ҳам —
Уста Маҳмуд эди!
Уста Маҳмуд —
кўзлари катта-катта, кетмон нусха соқол қўйган,
гавдали бир киши эди. Мулла Тошпӯлатга нисбатан
ёшроқ бўлса ҳамки, салобат билан, — икки қули ор-
қасида, — сал букчайиброқ юрар эди.
Кўчаларда судралган Тоштемир — иш излагани-
да,—
шу одамнинг ёнига келган эди!
Аммо кўп ўтмай,
у даста тузиб, Уста Маҳмуддан узоқлашди.
Уларнинг йўли ажралди.
Тоштемир бутун вилоятда ҳукмронликни қўлга ола
бошлади!
Уста Маҳмуд эса:
шогирди қурувчиларни жамлаган пайтда эмас, —
вилоятдаги барча ҳунармандларни
Бир Дастага бўйсундиргандан кейин ҳам —

кичик бир дастага бош бўлиб юраверди.

Тоштемирга эргашмади!

Тоштемир илтифот қўрсатишга уринди. Бўлмади.

Гаплашгани одам юборди. Бўлмади.

Уста Маҳмуд — метин эди!

Ниҳоят, Тоштемир йигитларига Устани бир оз кўрқитиб қўйинглар, деб буюорди.

Лекин йигитлар саллани ол, деса, каллани олгандек, иш тутишди:

Уста Маҳмудни уриб-тепиб, қовурғаларини синдириб, фалажга уҳшаган бир ҳолга солиб қўйишди.

Улар улдиришса ҳам, Тоштемир парво қилмас эдику, бу воқеа одамларда —

фавқулодда таассурот уйготди!

Тоштемирнинг кайфияти бузилди.

Дард устига чипқон, дегандек

Уста Маҳмуд бош бўлган дастадаги йигитлар бу воқеадан жунбушга келишди.

Улар — қурқиб, Тоштемир томонга ўтиш қаёқда!— улдирса, бизни ҳам ўлдирсин, аммо жаллодга эргашмаймиз, деб қасамёд қилишди.

Тоштемирнинг пайтавасига қурт тушди.

У қош қўяман, деб кўз чиқарган шотирларидан икки йигитни шаҳардан четлатди; горга, аскарликка жўнатди.

Бу билан кифояланмай,

совға-салом кўтариб, ярашиш учун шахсан ўзи Уста Маҳмуднинг уйига борди.

Тушакда михланиб ётган Уста Маҳмуд —

Тоштемирни кўришни истамасди, —

унинг юзига қарагиси ҳам келмади.

Бироқ Тоштемир пойгакда тиз чўқди;

фақат яхши сўзлашиб қолмай, бир йўла устозини «эритиши»га чоғланди.

— Йигитлар аҳмоқлик қилибди, пешво. Мен уларни жазоладим. Керак бўлса, яна жазолайман. Уругини қуритиб юбораман! — деди у ўйчан, эзгин оҳангда. — Мен шоҳ қаторидаги одамман, биласиз. Катта бошимни кичик қилиб, ёнингизга келдим. Бўлган иш бўлди. Олдингидек, қўлни-қўлга бериб, ишлайлик. Иноқ яшайлик! Менинг тилагим шу...

— Бу нима, босқинми?! Менинг сен билан гаплашадиган гапим йўқ. Бекор келибсан! Тилимни қичитмай қўяқол! Кет! — асабийлашди Уста Маҳмуд.

— Жаҳл чиқса, ақл қочади. Қизишманг, пешво.

Мендан бир айб ўтган бўлса, айтинг, эшитай... Мен учун инсон — оламнинг гултожи, борлиқнинг шоҳи! Ўз ақли, ўз кучига ишонади! Осмондан марҳамат, эҳсон кутмайди! Дунёнинг турт кунлик эканлигини билib, «Фу» деб юраверади. Бир марта берилган ҳаётни маşaққатлардан қўрқмай, роҳат-фарогатда ўтказади... Мен шунга интилдим. Сизлар ясаган қолипга сифмадим. Ўз йўлимдан бордим! Шу менинг гуноҳимми?! Мен сиздан шикоят қилаётганим йўқ; сиз ҳам мендан ўпкаланманг, пешво...

Уста Маҳмуд ётган ўрнида тўлганди.

— Демак, сен оқсан, мен қора. Бутун айб менда!

Сен мендан бемалол шикоят қилишинг ҳам мумкин!

— Мумкин. Лекин истамайман.

— Нега?! Бошладингми, гапир!

— Хўп, қўймадингиз, айтаман... Сиз менинг ишим ривож топганига суюнмадингиз, пешво. Бахилликми, гайирик қилдингиз! Ахир, мени қулласангиз, мен сизни бошимга кўтармайманми?! Отамга уҳшаб, етти қават кўрпача устига ўтқазмайманми?! Бунчалик эмасда... Балки, вилоятда Тоштемир кўпdir, лекин мен биринчиман. Биттаман! Мен билан ҳисоблашмай буладими?! Яхшилик ҳам, ёмонлик ҳам муомалага боғлиқ. Дунёда муомала керак...

Ўтмас арра гишиллаганидек,

Уста Маҳмуд негадир синиқ кулди.

— Бизнинг қонимиз энди қўшилмайди, бола! Ҳалол иш бор. Ҳаром... Сен атрофинингга йиққан ҳунармандлар ҳунармандга уҳшамай қолди! Азалдан қайси ҳунарманд безак, завқ учун эмас, ҳамённи ўйлаб ишлаган?! Сен уларни шу ҳолга солдинг! Диёнат кетди. Ҳеч ким Худодан қўрқмайди. Ҳаммасининг ақли, хаёли халқни алдаб, яхши яшаш! Кучага чиқиб қара, одамлар қандай кунга қолганини... Бизнинг қурувчи-лар-чи?- Ота-боболар тиклаган иморат билан сенлар курган бинони қиёсла! Қаттиқроқ шамол турса, агадариладиган уйнинг кимга кераги бор?! Худо кўрсатмасин, бир зилзилами, тошқин бўлса, одамлар бошини қайси деворга уради?! Ўзларинг учун кўтарган иморатлар ҳам ялтири-юлтур, омонат. Ҳаром йул билан эхром қуриш қийин! Фойдаси йўқ... Менинг буёғдан ўёгим яқин. Одамга бир қулоч ер етади. Мен шунча йил асраб, иймонимни сенга сотмайман, бола!

Тоштемир бу уйга йўл олганидаёқ

ўз ақлига зид, бошқа бир ақлга

рўпара келишини ҳис этган эди.

Мана, энди у бутун ақлини ишлатиб,
гап топиб беришга мажбур эканлигига
қаноат ҳосил қилди.

Шу аснода гўёки мутафаккир бўлиб жетди.
Суқротга айланди.

— Дунё узи омонат бино эмасми, пешво?! Алфа-
сона қурилган, арzon. Фоний бу жойда боқий иморат
қуриб, нима қилдик?! Бекорга азият чекканинг қола-
ди! Одамлар, дейсиз. Халқ, дейсиз. Буларга қорни
тўқ, усти бут бўлса бас. Бошидан ёмғир ўтмаса! Бирор
сизнинг офтоб жилоланган нақшларингиз қадрига
етибдими?! Яхши экан, ҳалол экан, деб озгина ҳурма-
тингизни ўрнига қўйибдими? Сизнинг одамлар ораси-
да лақабингиз Балиқча, билсангиз керак. Нега Балиқ-
ча?! Нафас ютиб, уз ишингизни қилиб юрганингиз
учун, албатта! Булар сиз эмас, кимки гирибонидан
тутса, кўчада туртиб ўтса, ўша билан гаплашади! Ҳи-
соблашади! Мен Наҳангман. Мени назарига илмай,
арзитмай кўрсин! Буни сиз тушунишингиз керак...
Истасангиз, ҳали ҳам кеч эмас, сизни ҳимоямга ола-
ман. Даволанасиз. Йигитларингизга бош бўлиб, дуне-
нинг гаштини сурасиз. Ўлгунингизча иззат-икром бу-
зилмайди. Факат, менинг йўлимга терс юрманг! Душ-
манлик, адоват сақлашдан ҳеч нарса чиқмайди...

Тоштемирнинг барча ҳаракати зое кетди.

Уста Маҳмуд барибир «эри»мади.

— Сен, бола, биласан, мен энди яримта одам-
ман, — деди у. — Мендан умид кам! Менинг ёнимга,
йигитларингиз уйинбузуқилик қилишмасин, айтинг,
деб келгансан... Айтмайман! Узим ҳам йўлимдан қайт-
майман! Гап шу!..

Тоштемир этак силкиб, ўрнидан турди.

Уйдан чиқиб кетаётib,
эшпик олдида тўхтади. Қаради:
қўшни хона деразасидан бир жуфт кўз —
уни нафрат билан таъқиб этмоқда
эди.

Уста Маҳмудга сўзи ўтмаганидан ҳам кўпроқ
бу —

унинг жонига наштардек
санчилди!

Аввалига
кузлар эгасини танимагандек бўлди.
кейин, бирдан...

ахир, Нигор-ку! —
Устанинг қизини эслади.
Болалиқда бирга ўсишган эди!

Икки оиланинг қисмати ўхшац эди:
Уста Маҳмуд ҳам уч фарзанд кўрган
(фарқи, ўғли йўқ, уч қиз),
хотини сўнгти йилларда вафот этган эди!
(Уста Маҳмуд ўғли бўлмагани-ю,
Тоштемирга меҳр қўйганидан, вақтида, —
қизларидан бирини —
балки, шу Нигорнидир?! —
унга никоҳлаб бериш нияти ҳам бордек эди!)
Нигор шўх, шаддод қиз эди...
улгайиб, ўт бўлибди-ку!

Деразадаги бир жуфт кўз
Тоштемирнинг юрагига чўкди-қолди!
Негадир энди муттасил, бир гап —
хаёлида айлангани-айланган эди:

*Ўзгалар-а роҳат-у,
менга азоб...*

* * *

У париционланиб, анча кун, Устани йўқотиш, қизини ўз қасри-саройига чўри қилиб олиб келишни ўйлаб юрди.

(Киморбозлик, наша, ҳар хил хонимларни кечалари сандиқда қасри-саройга келтириш —

Тоштемир учун одатдаги ҳол эди!)

Бунга унинг қурби етар,
ўзича шунга тайёр ҳам эди.

Бироқ қўрқди:

одамлар ичидаги баттар норозилик уйгониши мумкин! Бу — ўлган илоннинг бошини қўзғатиш билан тенг эди!

Шу кунлар, —
Уста Маҳмуд воқесаси сабаб бўлдими, бошқа важданми, —

Тоштемирни Мамлакат шоҳи
чинакам қасри-саройга чақиртирди.

Тоштемир қирқта йигити билан пойтахтга борди.
Йигитларни Дарвозахонада қолдириб,

узи Саломхонага — шоҳнинг ҳузурига кирди.

Шоҳ уни — кутганига зид ҳолда, — илжайиб қаршилади. Ота-үгилдек ачомлашиб куришиб, кифтига қоқди. Ёнидан жой курSATди.

Ниҳоят, сўради:

— Одамингиз шуларми?! Қирқтами?!

— Йўқ, кўп. Балки, тўрт юзтадир? Балки, тўрт мингта?! Узим ҳам билмайман, — деди Тоштемир.

— Аскар саногига етмаган саркарда бўлар эканми?!

— Бизнинг аскаримиз одамлар орасида қуринмай ётади. Кимлардир мени танийди, қолгани чувалчангга уҳшаб бир-бирига боғланган, ернинг остида; мен танимайман ҳам... Масалан, узим юрган вилоятдан ташқарида одамим борми, қанча?! — сизга шуни ҳам айттолмайман. Балки, вазир-вузароларингиздан учтўрттаси меникидир! Булар ўз вазифасида тураверади, лекин керак пайтда мени қўллайди, пинжимга киради. Худди суварак, кундан-кун, ўз-ўзидан урчиган нарсанинг ҳисоби бўлмайди...

— Мен биламан, ота-боболарим қаттиқўл кишилар эди. Қимир этган одамни босишаради. Бошини кесишаради. Кулоги, бурнини. Тилини! — деди шоҳ ўйчан. — Мен халқقا эрк бердим. Шафқат қилдим! Асал ҳам меъдани бузар экан. Одамлар меъёрни тушиунмади... Бу неча минг йиллик тарих. Ёғочнинг бўшини қурт ейди. Вақти-вақти билан шундай воқеа рўй беради. Одамлар қўзголон кўтаради. Бош буради. Кескин тўқнашувга бормаганда ҳам, сиздек бирор чиқади. Мамлакат ичида мамлакат, салтанат ичида салтанат юзага келади... Мен чумчук пир этса, юраги шир этадиган кишиларни ёқтирмайман. Довюрак-дадил йигитларни хурмат қиласман. Қолаверса, дунёда ақлсиз ҳеч иш битмайди. Тўртга одамни бошлиш учун ҳам ақл керак! Ақлни куч ишлатиб, енголмайсан! Шу боисдан, сиз билан яхши сўзлашиб ўтирибман... Эскидан ҳикмат бор. Бир қозонда иккита қўчкорнинг бози қайнамайди!

Тоштемир бу гаплардан сергак тортмади. Аксинча, кулди.

— Қозонга боғлиқ, шоҳим. Қозон катта! — Кейин, қўшиб қўйди: — Одамлар бекорга сайрайди. Форда йиққан аскарим узим учун! Мол-мулким ҳам эл қатори. Мендан бойроқ кишилар топилади! Мен сизга душман эмасман. Бирор тожу тахтни қўлимга тутқаз-

са ҳам, олмайман. Бошимга ураманми?! Кўнглим истагандек юрганимга нима етсин! Эркароқ, эркинроқмиз... Мендан хаёлингиз қочмасин! Кўрқманг!

Тоштемирнинг кулгани ёки
ўзини тенг-тўшдек тутаётганига —
шоҳ ҳам, аҳамият бермагандек бўлди.
У ўз тахтида ҳамон илжайиб утиради.

— Кўрқиб, ўлибманми! Лекин хаёлим қочади. Буниси тўгри! — деди салмоқлаб. — Кечалари ухломай чиқаман. Халқни ўйлайман... Сизнинг қўлингиз қон эканидан хабарим бор. Ҳаммаёқ ўгрини қароқчи урибди! — булиб ётганини ҳам кўриб турибман. Ишлар пачава! Иккимиз одамларни ҳалокатга бошляяпмиз. Сиз бир ёндан. Мен бир ёндан! Мен сизни чайнаганим билан, ҳозир ютолмайдиганга ўхшайман. Лекин эсингизда бўлсин, сиз дор остидасиз; фақат арқонни тортиш қолган...

Шоҳ тахтидан қўзғолди.
Кейин, негадир Тоштемирни яна бағрига босиб,
кифтига қоқди.
Тоштемир шоҳнинг гап-сўзларига ҳам,
муносабатига ҳам тушунолмади.
У, мулокатдан кўнгли тўлмай, —
паришонланган эди.

Қасри-саройдан чиқиб кетаётганида ҳам,
олис йўлда дала-дашт, қишлоқларни йигитлари билан оралаб бораётганида ҳам —

Тоштемир —
усти юпун, парча нонга зор
минг-минглаб одамларни кўрди.

Булардан ҳеч бири — унинг; афтидан, шоҳнинг ҳам —

«одам»и эмасди!
Аслида, халқ... шу эди!
Тоштемир беихтиёр
Даразадаги бир жуфт кўз —
Нигорни эслади:

*Узгалар-а роҳат-у,
менга азоб...*

* * *

Тоштемирнинг кўнгли
Уста Маҳмуддан ҳам,

Мамлакат шоҳидан ҳам
нотинч эди!
Буларни у эслашни истамас, аммо
бундан сўнг ҳаёти қандай кечишини билмагани-
дан,
унутолмас эди!
Ана шу боисдан, баъзан
тиғ дамида юргандек ҳолатни
ҳис этар эди...
Булар — хўп, гўрга; булар — бегона, узоқда;
унутиш ҳам мумкин!
Тоштемирга; —
у юрган йўлдан юрмаган,
пинжида туриб, пинжига кирмаган —
бошқа бирор, айниқса,
осойишталик бермаётган эди.
Бу — (ўзингиз англаб турибсиз!)
унинг отаси
Мулла Тошпӯлат эди!

Тоштемир, олдинлар — ҳам ота, ҳам она бўлиб,
унга жони-жаҳонини тиккан бу одам, нега кундан-кун
ёввойилашиб, бегоналашиб бораёттир?! Нима учун бо-
ласи қувончи, дардни баҳам кўрмаёттир?! —

шу тўғрида маҳал-бемаҳал
бош қотириб, асабийлашар эди.

Дунёда агар ўзи истамаса,
инсон эмас, ҳайвонни ҳам
бир ишга мажбур қилиб бўлмайди!

Мулла Тошпӯлат аввалдан Тоштемир тиклаган қас-
ри-саройга қафасга тушган қущдек, истар-истамас ки-
риб, етти қават қўрпача устига омонат қўнган эди.
Орадан кўп ўтмай, аста-секин қайтиб ўрнидан сиргала
бошлиди.

Бора-бора ўз ташвиши билан банд ўғил отани кам
куриши, аксар бехосдан «йўқотиб» қўйиши одат туси-
га кирди.

Тоштемирнинг йигитлари Мулла Тошпӯлатни баъ-
зан эски ҳовлидан, баъзан қизлари уйидан, баъзан
эса кўча-кўйдан «топиб» келишар эди.

Ота-болани, бир пайтлар жони-дилдан сухбат қу-
риб, баҳра олишарди, дейиш қийин. Лекин энди вақ-
тида бўлган севинч, самимият ҳам кетган, юз-кўзлар-
даги илиқлик сўнган эди. Мулла Тошпӯлат ўғли би-
лан гудраниб, узук-юлуқ гаплашарди. Тоштемир аса-

бийлашгани учунми, отаси олдида ҳар гапга «Фу!» дейверар, кўпинча ўз-ўзидан шундай бўлиб чиқар эди.

Улар орасида гоҳ-гоҳо бундай сухбат кечар эди:

— Машқингиз паст, дада?!

— Юрибман... Тушимга Зулфизар киради! Мен қиёматда онангта нима дейман?!

— Қиёматга бало борми?! Фу! Онамга нима дейишингиз керак?!

— Онанг сени шу ҳолда курса...

— Менинг ҳолим шунчалик хароб эканми?!

— Хароб... Иморат ҳам одамнинг ҳусни. Кийим!

Сен не-не обидаларни буздириб, ҳаммани каталакка тиқдинг! Ҳунар деган нарса қолмади! Ҳунарманд деган одамни кундузи чироқ ёқиб, тополмайсан!

— Фу! Сиз ҳам Уста Маҳмуднинг гапини қиляпсиз! Киндикларинг бирми, дейман?!

— Киндик бир! Мени ҳам калтаклашинг мумкин...

— Гапингизни қаранг-у! Фу! Уста Маҳмудни менга эслатманг! У душман! Шоҳ ҳам душман! Мени кўришолмайди... Мен кўп ишларни сизни деб қилдим, дада! Сиз учун! Сизнинг дунёда қашшоқ утишингизни истамадим! Топталган, бахтсиз яшаганингизга тоқат қилолмадим!

— Мени ўз гуноҳингга қўшма... Балки, бу менинг гуноҳимдир?! Менга ёзган қисматинг шумиди, Художон?! Боласидан курсин, деганмидинг?! Нега мени Уста Маҳмуд қилиб яратмадинг?! Ўшандай журъат, ирода бермадинг?!

— Фу! Яна, Уста Маҳмуд, дейсиз! Бошқа ном қуриб қолганми?! Уста Маҳмуд йўқ. Ўлган! Йўлини излайпман, холос! Қизини уйга чўри қилиб олиб кела-ман.

— Ундан дема, болам. Бўғзингтча гуноҳ. Баттар гуноҳга ботасан!

— Хўп, сизга нима етишмаяпти?! Савдоига ухшайсиз... Хотин олиб берайми?! Ёки уч-тўртта чўри ажратиб... маза қилмайсизми?!

— Уялмайсанми, болам?! Онанг олдида...

— Ўладиган дунё! Онам тушунар... Мен сизга онамдан яххисини топиб бераман!

* * *

Бундай сухбатдан кейин

Мулла Тошпулат қандай ҳолатда юради?!

Тоштемир билмас;
унинг ўзи
ҳафта — ўн кун
юраги гаш тортиб,
эзилар эди!

«Дунёга нима учун келдим?! Нега яшаяпман?!
Ҳаётда бирон маъно борми ёки бу номаълум бир на-
сибами?! Мен кимман?! Маконим қаерда?! Қуюндеқ
тентираб, бораётган манзилим қайси?!» —
Тоштемир шуларни ўйлар эди.

*Мақсад на эди — жаҳона келдинг?! —
кайфиятини баён этиб кет...*

Мақсадни аниқлаб,
кайфиятини баён этиш —
осон бўлса экан!

Умуман:
Тоштемир ҳаётида
буларнинг бари ўткинчи ҳол —
эпкин эди!
Хунармандлар орасида айланиб юришдан ташқа-
ри,
асосан, Тоштемирнинг иши
айш-ишратдан иборат эди.
Кун ора базм. Жинлар базми.
Қозондаги таомни ариққа ағдариб, янги қозон
осиши.
Буза. Бода.
Қуллар чилдирма чалган, чўрилар рақсга тушган;
Тоштемир эса:
— Қумри! Манави тиззамга... Қундуз! Сен манави...
Йигитлар навбат билан хониш қилишади:

*Чаманда гул очилди-е,
чакканга тақ, чакканга...*

Ашулачи хонимлар ҳам йўқ эмас. Овозлари етти
икълимга таралади:

*Бўса агар —
бўлса шакар...
Бўлса шакар,
ср, ср-ай...*

Тоштемир мастилик ва ҳушёрлик орасидаги бир ҳолатда юради.

Қасри-сарой ҳовлисида чайқалиб туриб,
энди фақат аҳен-аҳен
тушдек эслайди:
Нигор! —
Деразадаги бир жуфт кўз!

*Узгалар-а роҳат-у,
менга азоб...*

3

ТОШДАН БОШ...

Тоштемир — нима қилганда ҳам, —
дунёнинг гаштини сурмоқда эди.

Кимга оғир?! —
Мулла Тошпӯлатга!

«Не тирикмен, не улик, не сог, не bemormsn!» —
унинг аҳволи шундай эди.

У ўз умрида минг хил дарди-балони куриб, ҳеч қачон: «Тошдан экан бошим менинг!» — деб уйламаган; ҳеч қачон жонидан бунчалар безор ҳам бўлмаган эди.

Мулла Тошпӯлат қаёққа бориши, ўзини қаерга қўйишини билмас эди!

Ураган одамнинг олдида қўзлари жовдиарди.
Оғиз очиб, сўзлашга қўрқар эди!

Назарида, ҳамма унга таъна қилаётгандек эди:

— Ўглинг ёвуз! Қонхур!

— Ўглинг нонимизни тия қилиб юрибди! Муттаҳам!

— Ўглинг халқни бузяпти! Иймонсиз! Иблис!

Одамлардан қочгани билан, бу сўзларни у баъзан орқадан, баъзан очиқ эшитар ҳам эди!

Даҳшатли жойи: Мулла Тошпӯлатнинг узи бошқалардан олдинроқ ўглим одам эмас, деган фикрга келган эди! Бир томондан, албатта, Тоштемир ҳозир ҳам унинг жон-жигари, икки кўзи эди! Аммо иккинчи томондан, у энди кўпдан буён кўнглида ўглига нисбатан нафрат туяр, ўз қуллари билан ўглини бўгиб ташлаги-си келар эди.

Бунинг бари Худодан, деб уйларди Мулла Тошпӯ-

лат. Шу билан бирга, бот-бот Ҳайдар Махсумни эслар, «ёймачи» — афсунгар экан, фусун орқали ўглимни эгри йўлга солди, деган хаёлга борар эди!

Ойлар, йиллар шундай ўтиб...

шоир айтмоқчи:

«Ҳар нарсанинг боши ҳа охири бор!» —

У Ҳайдар Махсумни топиб,

яна бир гаплашишга қарор қилди.

Бозорга қатнайдиган бўлди.

Душанба куни борди.

Кейин, чоршанба,

Кейин, жумаи муборак.

Кейин,

пайшанба, якшанба қунлари ҳам борди.

Бозорда, дарвоза пинжида тизилган ёймачилар қаторида —

унинг эски пўстак устида ўтирадиган «ошна»си йўқ эди.

Унга таниш — Эзма ҳам кўринмас эди.

Қатор анча янгиланган, кексалар ўрнини ёшлар олган эди.

Мулла Тошпўлат қайта-қайта Ҳайдар Махсумни сўраб-суриштириди. Бироқ ҳеч кимдан маънили гап чиқмади.

— Унақа одамни билмаймиз!

— Эшитмаган эканмиз!

— У киши ўлган бўлса керак!

Мулла Тошпўлатнинг «ошна»си уйига борищдан бўлак иложи қолмаган эди!

Бир қунлар Эзма ёймачи берган «ахборот»ни эслаб, Мағриб томонга, шаҳар этагига қараб кетди.

Бораётган жойини дуч келган кишидан аниқлашга уриниб, кетаверди. Узоқ юрди.

Ҳайдар Махсум чиндан ўлган бўлса-чи, деб ичиди қўрқаётган, илоҳим, ўлмаган бўлсин, деб Ҳудога ёлбораётган эди. Унинг ҳозир илинжи шу эди!

Одамлар суриштириб, Маккани топган экан!

Ахийри, Мулла Тошпўлат тубида шагиллаб сув оқаётган жар бўйидаги қандайдир пачоқ ҳовлига рўпара келди.

Дарвозани секин тақиллатди.

— Очиқ. Кираверинг! — деди кимдир.

У дарвозани очиб, қархисида —

Ҳайдар Махсумни кўрди.

Ҳайдар Махсум Мулла Тошпӯлат билан нохушми-
лоқайдроқ кўришди. Аммо:

— Қани, ичкарига. Тортинг! — деди.

Мулла Тошпӯлат «ошина»сининг тирик эканини кў-
риб, суюнган; шу аснода бу одам ўглини «эгри йўлга
солгани», бундан норозиланиб юрганини ҳам унуган
эди! Ортиқча мулоғимат кутмади.

Улар биргина деразасига бўйра парда осилган ним-
қоронги даҳлизга, бу ердан хонага кирдилар. Тўртта
пўстак, ўртада яланг хонтахтадан бўлак хонада ҳеч
вақо қўзга ташланмас эди.

Пўстак устига қуниб, қўл очиб-очмай, —

Ҳайдар Махсумнинг невараси бўлса керак, — кўз-
лари ўйнаб турган жонсарак болакай дастурхон
ёзиб, икки коса сув, битта қотган нон келтириб қўй-
ди.

— Дастурхонга қарант. Уйда бори! Худонинг берга-
ни! — деди Ҳайдар Махсум.

— Эй биродар, гап нарсадами?! Одам овқат ейиш
учун келмайди, — деди Мулла Тошпӯлат. У йўл юрса
ҳам мўл юриб, очиқкан эди, бир бўлак нонни ивитиб,
сув билан паққос туширди. — Кўпдан буён бундай
мазза қилмаган эдим! Раҳмат сизга! — деди Ҳайдар
Махсумга.

Мана, энди улар қизгин суҳбатга чоғланишиди.

— Тинчмисиз, биродар?! — деди Мулла Тошпӯ-
лат.— Ўйнаб-кулиб юрибсизми?! — деди. — Бола-чақа-
дан қисинмаяпсизми?

— Рух йўқ, ҳол йўқ, — деди Ҳайдар Махсум. —
Чарчадим! Дунёнинг қизиқлигини кўрмайсизми! Бир
ташвишдан қутулсанг, янгиси чиқади!

— Мен сизни кўп изладим. Бозорга бормаяпсиз-
ми?!

— Инсон зарурат учун бозорга боради. Менинг
сотадиган ҳеч нарсам қолмади! Ҳаммасини сотиб, со-
вуриб бўлдим!

— Ана, сизга яна бир ярим минг! Олинг! — деди
Мулла Тошпӯлат танга санаб. — Лекин менга сотган
матоингиз ҳам ўзингизники! Үғлимни бўшатинг! Ол-
динги ҳолига қайтсан. Мен рози...

— Биз, сотган матони қайтиб олмаймиз. Қоида
шу! — деди Ҳайдар Махсум ғамгинроқ кўйда. У
Мулла Тошпӯлатга паришон қаради. — Нима, уг-

лингизга эс кирмадими?! Үглингиз ақлли, бўлмадими?!

— Үглимга эс кирган. Ақлли! — деди Мулла Тошпўлат. — Керагидан зиёд ақлли! Бир кунлар мени хонавайрон қиласди. Энди халқни хонавайрон қилипти! Дунёда нимаики яхши нарса бўлса, «Ффу!» дейди...

— Үглингиз Оқсоқол, Хўжайн экан! Шоҳ экан! Одамлардан эшитаман... Суюнмайсизми?! Матони қайтиб олсан, ким билади...

— Ота-бола ҳозир, иккимиз ҳам баҳтсиз! Ишонинг! Мен ўқимаганман; сиз олим. Бирон йўли... — Мулла Тошпўлат шошиб қўйнидан беш юз танга чиқариб, қушди. — Ўрнига бошқа, қолган ярим ақлингизни берсангиз ҳам, майли... Сиз ҳам энди инсоф қилинг, биродар. Вақтида, кераксиз, ёмонроқ ярми ни сотган бўлишингиз ҳам мумкин! Мени сода экан, деб алдаб... Бу гапни кавлаштириб ўтирумаймиз!

— Пулига яраша дуоси! Ўзимдаги ярми учун қимматроқ сўрайман...

Мулла Тошпўлат яна беш юз тангани қуртдек санади. Ҳайдар Махсумни, ниҳоят, қўндириди.

Ҳайдар Махсум алланималарни пичирлаб,
юзига фотиҳа тортди.

Мулла Тошпўлат қўнгли сал ёришиб,
уйига қайтди.

4

ЯНА МУЛЛА ТОШПЎЛАТ...

У энди Ҳайдар Махсум тўғрисида
«телбами-девонами!» — деб ўйламас эди.
Афсунгар! Вассалом!

Жинлар-ажиналарга боғлиқ дуоҳонлик, ҳар хил (жинларни кишанлаб, ишга солиш сингари) тадбирлар бидъят, бу ҳаттоки гуноҳ, деб эшитган эди.

Аммо Худо урган жинлардан ташқари, яхши, савобталаб жинлар кўп, деб ҳам эшитган; Ҳайдар Махсум — олим одам, ажратса керак, ихлосу халос-да, Худонинг ўзи кечирсин! — деб ўйлаб,

шу йулдан борган эди.

Мулла Тошпўлат ақлли одам эди!

Фалон танга бекорга кетган, муллажирингдан мен-
та жиринги қолган бўлса-чи! — масалан, шу йўсин
хаёлларга бориб, эзилишга одатланмаган эди. Садақа-
дир, эҳсондир, закотдир?! — одам харж қиласан-да!
Айниқса, Мулла Тошпўлат ўғлиниг пулини олиб-со-
вуроётгани йўқ. Бу пул узиники; бир қора кунимга
ярар, деб йиллар бўйи йикқан эди. Ҳозир шуни шош-
масдан кеткизмоқда эди!

У энди ўз-ўзини алдагандек, бунинг устига,
алдангандек ҳолатни ҳам ҳис этмас эди!

Маълум бир натижа чиқишига шубҳа-гумон қил-
мас эди!

Фақат, Ҳайдар Махсум бу гал сотган мато нима-
дан иборат?! —

аниқ сўзлаша олмагани, билмаганидан, юраги та-
ка-пука, ҳаяжонланмоқда эди.

Ўйда эса...

уни...

хаёллига ҳам келтиргмаган

воқеалар

кутмоқда эди.

Мулла Тошпўлат эрталаб уйдан чиқиб кетган,
Машриқдан Мағриб томонга бориб қайтгунича —
кун қариб, вақт намозгарга яқинлашган эди.

Гузардан ўтиб, ўглимнинг олдига кирсаммикин
ёки эски ҳовлида ўзи мени йўқлашини кутсаммикин?!—
деб иккиланиб турган эди;

бошини кўтариб,
анграйганича, қотиб қолди.

Аввалига Мулла Тошпўлат, кексалик қурсин, бош-
қа кўчага кирдим шекилли, деб ўйлади. Кейин, дик-
қат қилгач, баттар

ўзини йўқотиб қўйди...

Эски ҳовли жойида эди. Аммо
унинг ёнида — олдинги, бўм-бўш майдонча!

Қасри-сарой қани?! Тоштемир қани?!

Чаққон йигитлар-у,
қуллар, чўрилар қани?! —
ном-нишон кўринмас эди!

Кимдир Тоштемир тиклаган қасри-саройни
тапир-тупир ер билан яксон қилиб,
ғиштини ҳам қолдирмай, супуриб ташлаган эди!
«Булиши мумкин эмас!» Лекин:
...мумкин экан!

(*Тилла балиқ ҳақидаги
эртакка ўхшайди...
Тогора олдида утирган кампир
қасри-саройга эгалик даражасига етиб,
кейин яна —
тешик тогора билан қолгани!)*)

Майдончада биргина тұти хиромон айланмоқда әди.

Мулла Тошпұлат үзича, Тоштемир асраган тұтилардан бұлса керак, қафасдан чиқиб, үргантан жойда қолиб кетган, деб үйлади. Аммо әзтибор беріб, пайқади:

Бошқа! Олдин бир пайт күргани! —
Ганг бүйидан келғанми, Нил бүйиданми?! —
патлари камалакдек рангин;
ниҳоятда
чиroyли...

Мулла Тошпұлатни ғам босған әди.

У құшнilarға учраб, рүй берган воқеа тұгрисида әшитған-күрганларини сұрашға ошиқди.

Азалдан дунө шу...

қүшнiga сенинг осойиштегінгін өқади;
кулфатни булишадиган киши —
кам топилади!

Бириңчи құшни
құзларини бақрайтирди:

— Сиз меникига кириб, нега валдираяпсиз үзи?!

Мен ҳеч нарсаны күрганим ҳам, әшитганим ҳам йўк!

Иккинчи құшни, аксинча, уни мулойим қаршилади:

— Мен агар хабарим бұлсайди! Одамлар нима деяпти?! Номардлар индамаяптыми?!

Учинчи, тұртинги құшни
(энди қоронги тұша бошлаган әди!)
чироқни учириб қуйиб,
әшикни очмай утираверишиди.

Инсон — бошингта тушгач! — биқининг оғриса ҳамки,

дуч келған тепкига чидайсан!

Мулла Тошпұлат етти әшікка борди.

Ахийри, еттинги құшни, хайрият, —

олазарак атрофға күз ташлаб бұлса-да,

Мулла Тошпұлатта бор гапни етказди.

Боягина — ҳали икки соат ҳам ўтгани йўқ! —
Тоштемир йигитлари билан бозорда юрган экан;
теграсида тўпланиб, уни саволга тутган
одамларга шикоят қилибди.

У шундай дебди:

— Балки, менинг гуноҳим кўпдир! Лекин мен ни-
манى истадим?! Халқ бир ёқадан бош чиқарсин! Ҳам-
ма кун кўрсинг, яхшими-ёмонми, бошпанаси бўлсин!
Ҳунар эгаллаган киши қадрини топсин!.. Ўйлаганла-
рим амалга ошмаяпти... Сабаб?! Балиқ бошидан са-
сийди. Бутун ишлар юринг-кетайлик! Кўрмайсизлар-
ми?! Тартиб йўқ...

Уни —

гапи тугаб-тугамай, —
қандайдир номаълум кишилар
қуршаб олишибди.

Бошига қоп кийдириб,
арқон билан ўраб-чирмасибди.
Шу заҳотиёқ ёнидаги йигитлари
тумтарақай булишибди.

Тоштемирни эса аллақаёққа судраб кетишибди.

Ўша номаълум кишиларми, бошқа бир номаълум
кишиларми гузарга келиб, бойваччанинг мол-мулкини
мусодара қилиш буюрилган, дейишибди; қасри-са-
ройни бузиб,

тўпланган нарсани ташиб-йўқ қилишибди...

Мулла Тошпўлат рўй берган воқеани эшишиб,
аввалгидан кўпроқ — чуқур қайғуга ботди.

У Тоштемир ўз қилмишлари учун бир кун жавоб
бериши кераклигини ҳис этарди. (Шаҳар бедарво-
за эмас!) Аммо бу кун барибир гафлатда қолган
эди!

Энди олам зулмат-зимистон эди.

Гуристондек ҳувиллаб ётган ҳовлида
қўним топа олмай, ўзини ҳар ёнга отган —
Мулла Тошпўлатнинг

дам сайин
юраги зардобга тўлмоқда,
қон бўлмоқда эди.

Хозир Мулла Тошпўлат гўёки
бир девордаги туйнукдан утиб, бошқа, қалинроқ
деворга юзлашган кишидек ҳолатда эди...

Үғли бозорда нима қилиб юрган экан?! Уни ким,
нега тутиб, олиб кетишибди?! У қайси аҳволда?! Қаерда?!

Унга қандай учраб, шу оғир пайтда ёрдам қўрсатиш мумкин?! —

шуларни ўйлаб,
бирон чора топгиси келмоқда эди.

Қоронғида тентираб истаган ёқقا боришига ҳам тайёр эди. Бундан қайтмасди! Лекин қаёққа?! Үзининг дўсти борми?! — билмасди. Үзининг дўстлари — ундан юз ўтиришган эди!

Ҳовлидаги қуриган оғочларга дардини сўйлаб,
соат санаб,

Мулла Тошпўлат тонг оттириди.

Ювениб, тоза кийиниб, арз қилгани тўғри —
вилоят ҳокими ёнига борди. (Бундан булак чора
кўринмаётган эди!)

Ҳокимни учратиш осон кўчмади! Ҳоким у билан
сўзлашибни ҳам истамас эди... Йўқ, кейин:

— Энди мен эсларингта тушдимми?! Керак булиб
қолдимми?! Тоштемир мен юрган кўчага тупуриб ўтар
эди! — бир соат ваъз ўқиди. Ниҳоят, тушунтириди: —
Бу ҳаммаси Мамлакат шоҳи иродаси билан... Тоште-
мирни пойтахтга олиб кетишган! Дорга осмай қўйиш-
майди! Менинг қулим қисқа. Арагашолмайман...

Мулла Тошпўлатнинг шу сониядаги ҳолатини
сўз билан ифодалаш қийин!

Мулла Тошпўлат ақлли одам эди.

У Тоштемир тиклаган қасри-сарой туйқусдан ерга
«кириб» кетганини қуриб,
қўшнилар эшигига боргандәёқ —
бу ишдан шоҳнинг «ҳиди» келаётганини
кўнглида ҳис этган эди.

Туни бўйи ҳам бу ҳақда ўйлаган эди.

(Уста Маҳмуд Тоштемирга ашаддий душман бўлса-
да, икки дунёда бу ишга бормайди. Бир ҳовув йигити
билан кекса, мажруҳ киши буни бажаролмасди ҳам!)

Шу боис, Мулла Тошпўлат бугун
тўғри ҳокимга учраган эди.

Ҳоким нималар дейиши мумкинлигини ҳам —
у билиб турган эди.

Лекин

Мулла Тошпўлат ўзини-ўзи алдаган эди.

Тоштемирни «қўлга туширган»лар унинг ўзига ух-
шаш «бойвачча»лардир, бирон гурухми-тўдадир, шун-
чаки ўйин қилишган, деб умидланган эди!

Тоштемирнинг йигитлари қўл қовуштириб ту-

ришмайди; ана-мана уни қутқаришади, деб ишонган эди!

Яна шундай бир ҳолат...
ким-ким-у, Мулла Тошпұлат
үгли қанчалар осий банда (одам эмас!) эканлигини
яхши билар эди.

Тоштемир бор ақли, кучини үз роҳати-ю, бошқаларнинг азоби йўлида сарфлаб юрган эди.

Бироқ Мулла Тошпұлат
минг бора кўнглида Тоштемирга нисбатан нафрат туйиб, үз қўллари билан буғиб ташлагиси келганда ҳам,

Тоштемир — унинг боласи эди.

Этни тирноқдан ажратиб бўлмайди.

Мулла Тошпұлат нимаики иш қилиб, қандай муносабат тутмасин, болам одам бўлсин, баҳти бўлсин, деб қайғурган, Тоштемирга ёрдам кўрсатишни истаган эди.

Тоштемирнинг бошидан бир тола соч узилишига Мулла Тошпұлат, албатта, лоқайд қараёлмас эди!

Маҳкамада, ҳоким ҳузурида ўтириб,
«дор» деган сўздан —
унинг жони ҳалқумига келиб тиқилди.

У бир томондан, ўғлига қанча жазо берилса, кам эканлигига ақли етиб турарди.

Иккинчи томондан, ҳамон
боласига ёрдам кўрсатишни истаб,
чора изламоқда эди.

Шу куниек Мулла Тошпұлат
пойтахтга жўнади.

Мамлакат шоҳининг оёғига йиқилиб, Тоштемирнинг бир қошиқ қонини тилаб олишга
қарор қилган эди.

Пойтахтда унинг иши юришмади.
Ўртаниб-қайсарланиб, —
шоҳнинг үзи эмас,
қасри-саройига ҳам ў яқин
йулаёлмади.

Умуман,
Мулла Тошпұлат бу ерда шуни пайқадики,
шоҳнинг қасри-саройи-ю, ҳашами қаршисида —
Тоштемирнинг туриш-турмуши —
ҳаммом олдида болалар «ҳаммомпиш» ўйнагандек гап экан!

(Буни бошқача қилиб ҳам
айтиш мумкин:
«Жаҳон ганжига шоҳ эрур аждаҳо,
Ки утлар сочур қаҳр ҳангомида...»)

Пойтахтни айланиб, Мулла Тошпӯлатнинг эришгани:

Тоштемир зинданда ётганлигини аниқлади.
Турт зинданбоннинг кўнглини топиб, улардан бири (яхши одам экан!) Мулла Тошпӯлатта Тоштемирни узоқдан кўрсатишга рози бўлди.

Маҳбуслар ётган хоналар ертўладек чуқурликда жойлашган, қоронгу эди. Мулла Тошпӯлат тепадан туриб, шу хоналардан бирида, тўшалган сомон устида ўтирган уч-турт кишини кўрди. Тоштемирни, зинданбон қули билан кўрсатганидан кейин, таниди. Тоштемир ёқасиз, катта бир сурп кўйлакда, оёқ-кўлида кишин, бўйнида занжир, бошини кўксига солинтириб ўтирас эди... Мулла Тошпӯлатнинг кўнгли бузилиб, кўзларига ёш тўлди. Зинданбон унга, ўглингизни осадиган куни ўғилчам орқали хабар қиласман, келиб кетасиз! — деб куюниб (яхши одам!) ваъда берди...

Мулла Тошпӯлат пойтахтдан йиглаб-йиглаб
уйига қайтиб келди.

Шу кунлар — ўзи билан ўзи оворайи-саргардон эди;

аммо у, масалан, бир қур ҳам
Ҳайдар Махсумни эсламадими?!

Ахир, «ошна»сини излаб топган қундан —
хонадон кутимаган, янги савдоларга
йўлиқмадими?!

Наҳотки, Мулла Тошпӯлат бунга
бепарво қараса?!

Йўқ, Мулла Тошпӯлатнинг хаёлидан — Ҳайдар
Махсум кетмаган эди! Мулла Тошпӯлат афсунгарни унутмаган эди!

«Ошна»сига учраб: «Матоинг бошингда қолсин!
Буниси олдингидан ҳам баттар экан-ку! Одам бировга шунаقا дардисарни сотадими?! Менга боламнинг боши азиз! Болам бечорани сен саргардон қилдинг!» — дейишга

у неча бор чоқланган эди!

Назарида, ҳозир айниқса шундай қилиши шарт эди! Тоштемирнинг такдири ҳал бўлмоқда эди!

Бироқ

Мулла Тошпулат ҳеч қачон Ҳайдар Махсумнинг гирибонига қўл чўзмаган; ҳамон бундай хатти-ҳаракатга ботинмас эди. Гап шундаки, аввалдан-охир Ҳайдар Махсум эмас, унинг ўзи Ҳайдар Махсумга «ёпишиб» олган, нажот тилаган эди! «Ёймачи» (афсунгар) эса, аксинча ўзини доим осойишта туттган; Мулла Тошпулатни ҳатто бу йўлдан қайтаришга уриниб, огоҳлантирган эди!

Бунинг устига,

Мулла Тошпулат тушунмаётган — билмаётган эди:

Ҳайдар Махсумнинг «дуо»си билан —
ӯша палладан рўй бера бошлаган воқеалар
бир-бирига боғлиқми?!

Нега бундай бўлди?!

Тоштемир — кечаги, кўриб юрган Тоштемирми ёки

қандайдир

ўзгариб қолдими?!

ТОШТЕМИР — ИККИ...

Энди яна гапни Тоштемирдан эшитинг.

У осойишта кун кечирмоқда эди.

Йигитлари билан шаҳар айланастиб,
бозор қаршисидан чиқиши.

Йигитлардан бири, бозорга кириб қовунхўрлик қилсак-чи, деган таклифни уртага ташлади.

Купчиликка бу фикр маъқул кўринди.

Улар бозор томон юришди.

Тепаликдан пастга энаётиб,

Тоштемирнинг кифтига нимадир тап этиб тушди.

Тоштемир, осмондан чалпак ёғибди, деб —

галати шу гапни кулиб эслаганича, бошини буриб қаради.

Унинг кифтига патлари камалакдек рангин, —

чиройли тути келиб қўнган эди!

Тоштемир бу қушни қачон, қасрда кўрганини уйлаб,

хотирасида тиклаёлмади.

Эскидан одати буйича «Ффу!» деб қўйди.

Тути ҳуркидими, ҳар қалай, учиб,

Тоштемирнинг боши устида чарх урганича, бадар кетди.

Тоштемир хаёлга ботди.

Унинг (бир пайтлардагидек) бошида санчиқ турган, миасини кимдир аёвсиз пармаламоқда эди.

Негадир болалик кунлари, меҳрибон онажони ёдига тушди.

«Исми Зулфизар биби булгани-ю, менга шоҳлар қасри-сарайи, тўтилар ҳақида эртаклар сўйлаганига қарамай, онам хонлар зурриёти эканлиги ёлғон, албатта! Безакли исмлар қўйиб, бир нарсаларни тўқиб — бечора халқ узини-ўзи овутган-да! Бусиз яшаш оғир!» —

у беихтиёр шундай хаёлга борди.

Бундан сўнг:

«Демак, менинг бойваччалигим, шоҳлигим ҳам ёлғон! Бу — бир ўйин, нари борганда, исён, холос! Мен ўз волидаси қадрига етмаган нодон! Бошида посбон биргина отасини қийнаб юрган калтабин! — шундан бошқа менинг хислатим, фазилатим қани?» —

деб ўлади.

Эҳтимол, бу гаплар кўпдан буён унинг шуури қаърида чўкиб ётгандир?! — лекин ҳеч қачон буларни ўйламаган эди; ҳозир юзага қалқди. Тоштемир — гўеки бехосдан ақли ишлаб, кўзлари мошдек очилган эди!

Бундан сўнг эса,

ҳаётида баъзан бўлганидек, яна

шуларни хаёлидан кечирди:

«Дунёга нима учун келдим?! Нега яшаяпман?!
Ҳаётда бирон маъно борми ёки бу номаълум бир насибами?! Мен кимман?! Маконим қаерда?! Қуюндеқ тентираб, бораётган манзилим қайси?!»

Шу дамда

онажонига тегишли ўйларми,

ўз ҳаёти борасидаги хаёллар сабабданми?! —

Тоштемирнинг кўзлари ўнгидаги шоҳ жонланган ва қотиб қолган эди.

Тоштемир шоҳга хаёлан мурожаат қилди:

— Ишлар пачава, дейсизми?! Одамлар айниганими?! Бор айбни менга тўнкамоқчисиз... Шошманг, тасаввур қилинг. Бир отнинг устида икки киши ўтирибмиз. Сиз олдинда, мен орқада. Хўш, жиловни сиз тортасизми ёки менми?! Балки, менинг гуноҳим кўпдир. Лекин...

Тоштемир теграсида халойик тўпланаётганини пайқади.

Унинг хаёлидаги гаплар тилига кўча бошлади.
Ҳали гап тутамаган эди;
кимдир гаврон билан бўйни, сунг бошига тушириб,
уни даврадан четта торта бошлади.
У кучли, чарс эди; у ҳам кимнидир уриб, кимнидир суриб ташлади. Аммо аёвсиз тўлқин бостириб келиб, ер тишлатди; аллақаёқларга силжитди-кетди.
Тоштемирнинг ҳамон боши оғримоқда эди.
Мадори қуриб, —
кузлари олди қоронғилапди...

* * *

Кейин:
ҳамон зулмат ичида, қўл-оёқлари боғлик; — аравада гужанак бўлиб ётганини сезди.

Кейин:
(боши оғриғи босилган эди)
бир оз узини ўнглаб, йигитлар билан бозорга йўналган пайтдан —
«ур-сур»да улар ҳар ёқقا қочишганигача —
рўй берган воқеани эслашга уринди.

Кейин, пайқади:
кимлардир паст товушда ундан-бундан сўзлашишмоқда эди.

Тоштемир дикқат қилди:
тўрт киши!
У ажабланди:
наҳотки, қирқта йигит тўрт кишининг қўлига уни топшириб, ташлаб кетишган бўлса?! Ишонган йигитлари шарпадан хуркийдиган «ойимқиз»лар экан-да!
Уларда юрак йўқ экан-да!

Тоштемир шу аснода ҳис этди:
парда орқасида — шоҳ турибди!
(Сен шоҳдан жиловни тортишини сўраётганмидинг?! Ана, тортди! Ўйин тугади. Тамом!)

Унга энди аён эди:
йигитлар олдиндан нима булишини билишган, албатта. Ҳатто, уюштиришга ҳам ёрдам беришган! Улар хиёнат қилишган!

Арава ўнқир-чўнқир йўлда, бир маромда чайқалиб бораарди;
қанча йўл юришди?! — Тоштемир билмас эди.
У — суюклари пўла ҳолда, баданига қуруқ тахта

ботиб, сўйилишга олиб кетилаётган қўйдек, *нафаси бўгзига тиқилиб ётар эди... Ўлимга маҳкум эканлиги ни тушунганидан, тўғри дор остига элтишса керак, деб ўйламоқда, буёги фақат иш тезроқ ниҳоясига етишини кутмоқда эди.

Тун ўтдими, кун ўтдими?! — ахийри, арава тўхтади.

Тоштемирни аравадан тушириб, пойи-пиёда, судраб-ҳайдаганча,

қаёққадир бошлишди.

Тепаликка кўтарилишди. Кейин, чуқурликка тушишди.

Уни арқондан бушатиб, юз-қўзини очишиди.

Иш бошқача кўчган эди. У ҳали яна, сўйиш учун боғлаб қўйилган қўйдек, улимни кутиши керак! Оёқ-қўлига кишан солиб, занжир билан боглашди... Йулдаги вақтингчалик азоб ўрнини муддати номаълум, кундалик машақкат эгаллаган эди.

Тоштемир ўзини қоронғи хонада, тўрт маҳбус орасида курди.

(*Зиндон!
Совуқ, заҳ макон!
Бир кузга сув, бир бурда нон!...)*)

* * *

Кунлар
бир-бирига уланмоқда эди.
Тун билан куннинг фарқи йўқ.
Энди сенга кийдирилган қоп — шу гарид бино!
Ҳайбатли қалин эшик.
Тош деворлар.
Шифтга яқин ерда қорайган туйнук — олам.
Маҳзун ва мискин тириклик!

Ўзи дуч келган ҳолат, юз бераетган савдолар —
Тоштемирни
гангитиб қўйган эди.

Унга зинданда, тор бу қафасда биқиниб ётиш ўлимдан оғир, ўлимни кутишдан — ўлим афзал ҳам булиб туюлар эди.

Айниқса, сўнгги йиллар дунёнинг гаштини суриб, боши айш-ишратдан чиқмай юрган Тоштемирнинг энди ҳаёти, қисмати бирорлар қўлида; тахтидан сар-

нигун қулагани устига, у энди кимларгадир қарам,
хору-зор кўйга тушган эди.

Атчиқ-атчиқ бўзлагинг келади!

«Хўкмдорлар, амалдорларнинг дабдабали ҳаётлари-
га қарама! Уларнинг қандай тезлик билан дунёдан
утиб бораётганларига ва ҳаётларининг хотимаси ёмон,
аянч эканлигига қара!»

Тавба! Яна:

«Иблис дейдикি,

ҳавоий нафсга берилиб яшасалар — бутга топиниш
шарт эмас! Мен уларни уч йўсинда йўлдан оздира-
ман!»

1. *Ҳаром, ноҳақ фойда топишга ружу орқали.*

2. *Йиққанларини нолойик ишларга сарфлаш орқа-
ли.*

3. *Лойик бўлган ишларга харж қилишдан қайта-
риш орқали...»*

Эски, минг йиллик тушунча; лекин
шахсан Тоштемирга тегишли...
унинг кўрган-кечиргани. Умри!

Буни у —

мана, энди тутқунлик-саргардонликда англай бош-
лаб, — ҳаммадан ҳам, париционланган эди.

НИМА ҚИЛИШИни билмасди!

*«Кишининг юрагида дунё хаёли — охират хаёли
билан юзлашади...»*

Шундай! У энди бирон нарсани эслашни ҳам,
уйлашни ҳам истамас эди.

Уни зил мудроқ босгандек эди.

Туну кун бошини кўксига солинтириб утиради.

Бирор билан сўзлашмас, бирорга бош кўтариб қа-
рамас ҳам эди.

Дор остига олиб боришган кунга қадар шу тах-
лит...

Дарвоқе:

Фақат бир гал...

Хонага янги маҳбус келди.

Бу — қизиқ йигит экан. Тоштемирнинг нақ пин-
жига тиқилиб, чўқкалади. Унинг кўйлаги этагини ўп-
ди. Кейин, беҳол кўлинни тутиб, юз-кузига суртди.

Тоштемир сергакланиб, сесканди.

— Сен кимсен?!

— Менми?! Илес... Этиқдўз!

— Илес... Оёқ қучиб, ўрганиб қолганмисан?! Нега суйканасан?!

— Мен суйканмайман, — деди Илес. — Сиз бизнинг Пиримизсиз! Сиз Оқсоқол, Хужайин! Сиз шоҳ... Буюк Инсон! Оlam яратган Буюк Курувчи!

— Сен адашдинг. Буюк Курувчи Оллоҳ! Қурадиган ҳам, бузадиган ҳам... Мен ожиз бир банд! Мен англадим! — деди Тоштемир.

— Сиз барибир, Биринчи...

— Йўқ, Оlam Биринчи, биз барчамиз Иккинчи эканмиз! Мен англадим...

— Сиз менинг сифинган шоҳимсиз! Барибир... Гапирманг!

— Сен нима, девонамисан, Илес?!

— Менми?! Йўқ, мен девона эмас... Мен учун сиз барибир Қиблиагоҳ! Сизни деб юрганман! Сизни деб ўламан...

— Тухта! — деди Тоштемир. — Сен мени билмас экансан. Мен осий банда! Гуноҳим кўп. Қўлим қон...

— Гапирманг! Сиз ҳеч кимни ўлдирмагансиз. Йигитларингиз кимнидир гўрга тиқишиган бўлса, ўзлари жавоб қилишсин!

— Йўқ, уларнинг гуноҳи менини! Мен ақл берганман. Бош бўлганман! Сен мени билмас экансан... Хўп. Бошқа гап... Бў сен, этикдўз бўлсанг, қандай зиндонга тушиб қолдинг?!

— Менми?! Қўлимга битта темир, бир парча тош олиб, кўчада одам пойладим!

— Нима учун?! Бирорда қасдинг бормиди?! Нега тош билан темир?!

— Сиз Тоштемир-ку! Сиз учун қасос олмоқчи эдим!

— Эй, Худойим-эй... Сенинг гуноҳинг ҳам менга юкланаар экан! Сен чиндан девона экансан... Мен салтанатни эгалласам, сенга яхши бўлармиди?! Йўқ, оғайнни. Бунинг ҳаммаси телбалик! Мен косани бекор чайқатдим... Умуман, дунёда ҳар ким ўз ишини қилгани дуруст экан! Шоҳ шоҳлигини, гадо гадолигини... Майли. Тухта. Менга қара. Одамлар нима деяпти?! Менинг дадам-чи?! Юрибдими?! Агар билсанг...

— Одамларни билмайман, — деди Илес. — Лекин отангиз уйдан чиқмай ётибдилар. Ишлари чатоқ...

— Тушунтири!

— Сизга бир нарса бўлса, кутаролмайди! Уста Маҳмудга уҳшаб...

— Уста Маҳмуд?!

— Уста Маҳмуд.... Сизни тутишгач, дорга тортади, деган гап тарқалди. Ўша куни юраги ёмон бўлган! Кечга бориб, узилди...

ЭвоХ! Тоштемир душман деб юрган Устанинг юрагида унга нисбатан шунчалар куюнч бор экан-ку!

Унинг куз олдига соқоли кўксини тутган, буқчайиброқ турган Уста қиёфаси келган эди.

У этикдўзни туртиб, пинжидан нари сурди.

Бошини эгди.

Шу аснода Тоштемир Уста Маҳмуд ва...

Илес деган (уст-боши фижимланган, кўримсизги-на) — бошқа бир йигит тўгрисида

хаёлга чўмган эди.

Билмадимки,

бу жаҳон фоний-у, қажрафтор экан,

Яхшилар

доим ёмоннинг ҳожатига зор экан...

Тоштемир Илесни танир,

кучакўйда баъзан учратиб, давраларда шеър-қўшиқларини эшишиб юрар эди.

Илес унга қандай қараган?! — айтиш қийин. Лекин бу йигитни у сариқ чақага олмас, одам ўрнида кўрмас эди!

Мана, энди...

унинг хаёлида Шоир — Уста билан ёнма-ён қомат тиклаган эди.

Хоҳ мусаввир,

хоҳ мунажжим,

хоҳ султон,

хоҳи бек —

Асл инсонликдин ўзга ҳаммаси бекор экан...

Тоштемир хомуш тортган эди.

Шундан кейин, ногоҳ...

Деразадаги бир жуфт куз! —

*(Ўзгалар-а роҳат-у,
менга азоб...)*

Нигорни
эслади.

*Ёр ила бегонанинг
фарқин билолмас кимсалар —
Еридан бегона-ю,
бегоналарга ёр экан!*

Бошидан кечган бутун шу кўргиликлар давомида биринчи бора —

Тоштемирнинг юзига кўзларидан икки томчи ёш сизиб тушди...

* * *

Тоштемирни

кутилмаганда бир куни хонадан олиб чиқишиди.

Киshan, занжирдан бўшатишиди.

Яна арқон билан чирмашди.

Кейин, дор остига етаклашиди.

Коронги хонада бўлганидан, аввалига офтобга қаравалмай, кўзлари қамашди.

Кўпинча түядек чўкиб ўтирганидан, оёқлари чалишиб кетди.

Йўқ, тезда ўзини ўнглади.

Бошини эгганича, кучада тўпланган, анграйган, пичирлаб-шивирлашган одамларга аҳамият бермай, илдам босди.

Майдонда айниқса одам қайнар эди. Томошабинлар!

Булар орасида — Тоштемирга хиёнат қилган йигитлар бор! Лекин этикдўз Илесга ўхшаган телба фидойилар ҳам!

Соқчилар ҳай-ҳайлаб йул очиб, майдон марказига этишиди. Баланд супага кўтарилишиди.

Тоштемирни устун олдига келтириб, ниҳоят, йигитлар билан сўнгги марта бозорга борганида бўлганидек, унинг бошига қоп кийдиришиди.

Лаҳза ичида Тоштемир ўтган ўз ҳаётини аниқтини кўргандек бўлди.

Шу пайт у негадир яна Илес (этикдўз эмас!)ни эслади:

*Менинг сунгти йўлимдир,
гар йигилса дўсту ёронлар,
Бу кун мотам куними,
ё ажаб бозор?! — деб йиғланг...*

Тоштемирнинг бўйнига арқон солишиди. Арқонни тортишди.

Унинг иши битгандек эди!

Бироқ...

айни фурсатда нима учундир
майдонда:

— Бушат! Бушат! — деган ҳайқириқ янгради.

Бўғизни пайпаслаётган арқон бўшаша бошлади.

(Мамлакат шоҳининг қизи ўғил — фарзанд кўрган; шунинг шудиёнасига шоҳ Тоштемирнинг гуноҳидан кечган эди! Буни Тоштемир кейинчалик билди. Ҳозир эса...)

У оғги ердан узилганида, —
қайтиб ерга қўнди.

Бошидан қопни олиб ташлаб, йул очишиди.

Ҳеч нарсага тушунмай саросималанганидан, қаёқ-қа қараб юриши, ўзини қандай тутишини билмас эди! Куп утмай, мункиллаган бир қария теграсида айланниб, оғига йиқилмоқчи булаётганини пайқади.

Тоштемир, ким экан, деб диққат қилиб қаради.

Бу — Мулла Тошпӯлат эди!

У отасини кифтидан кучиб, ўрнидан турғазди.

Кейин...

ота-бола пойтактдан уйга жунашди.

Тоштемир уйда ҳам...

бир неча кун бошини кўксига солинтириб ўтирди.

Йўқ, тирик жон қимирлаши керак экан! —

Худо, деб кўчага чиқди.

У тузган Биргина Даста аллақачон тўзиган эди.

Ҳеч кимга қўшилмай, яккақўл уста бўлиб, ўз куни-ни кўра бошлади.

Шундай яшаб юравермоқчи эди; аммо —

унинг эркинлиги узокқа бормади!

Тоштемир отнинг қашқасидек маълум киши эди; атрофига аста-секин яна одам йигила бошлади.

Биринчи навбатда:

— Мен сизнинг қулингизман! Ўлсам, ёнингизда уламан...

— Мен сизнинг чўрингиз, ахир! Ҳайдасангиз ҳам, кетмайман... —

ҳовлида ўз-ўзидан, олдинги пайтдагидек, қуллар, чўрилар пайдо бўлиб қолишиди. Тоштемир курган қасри-сарой бузиб ташлангани, бу — тору танг, хароб, — эски ҳовли эканлиги билан уларнинг иши йўқ эди!

Шундан сүнг:

гурӯх-түрух қурувчилар.

— Кимдир сизга хиёнат қилган бўлса, кур бўлсин!
Битта-яримта хоин учун... бизда нима гуноҳ?!?

Ниҳоят:

бир оқшом Илес (этикдўз) ҳар хил қасбдаги сак-
кизта одамни бошлаб, эшикка келиб турибди.

— Сиз Оқсоқол! Сиз Хужайин!

— Сиз Пиримиз. Қиблагоҳ!

— Сиз шоҳ..

На кундуз ором бор,

на тунда уйқу.

Тоштемир қийин аҳволга тушган эди.

Одамларни эшикдан ҳайдаш мумкин. Бўйнига
уриб! Лекин уларнинг юз-қўзларидағи илтижони қан-
дай ҳайдайсан?! Эътиқоддан қочиб, қаёққа борасан?!

У тушунмаётган эди... Ўз манфаатини кўзлаб,
халққа шунча зулм қилганига қарамай, булар нега
бунча унга ёпишябди?! Нима учун тинч яшашга
кўйишмаябди?!

Ҳаммаси оддий... Тоштемир озми-кўпми, барибир
одамларни уйлаган эди! Булар ўзлари ҳақида бирор-
нинг ЎЙЛАШИГа муҳтож! ЭЪТИБОРГа муҳтож!

Шу кунлар у ўзича яна бот-бот

Шоҳга мурожаат қиласидиган булиб қолган эди:

— Одамлар қадримга етмайди, дейсиз! Одамлар
айниган, дейсиз! Халқни айблаб бўлар эканми? Мен
гуноҳкорман. Сиз... Аммо халқ эмас! У, шўрлик эзгу-
ликка ташна! Бахтга ташна! Отдан тушиб, кўксига
кулоқ тутишингизни истайди. Кутади... Мен биламан.
Қўшнига чиқиб, ўглингни фалончи қизга уйлантири-
ма, писмадончи қизга уйлантири, деб оёқ тираган
одамга ўхшаб турибман! Бошқариш менинг вазифамга
кирмайди. Ҳар ким ўз ишини қилиши керак! Мен
оддий қурувчиман! Лекин инсон, атрофга қарашга
мажбурсан...

Тоштемир энди баъзан чуқур хаёлга чўмиб, эзилар
эди.

Мехрибон онажонидан

давлати, салтанатини йўқотиб, юртидан олисда
яшаган бир шоҳ ўз ҳолига йиглай-йиглай кўр бўлганини
эшитган эди! Бу — афтидан, эртак эмасди... У,
менинг шоҳлигим ёлгон, деб адашган; ўша шоҳ —
аниқ унинг аждоди бўлса-чи?!

Баъзан эса, Тоштемир эслар эди.

Дарвиш-қаландарлар орасида шундай нақл бор:
«Дунёнинг ўзи кафтдаги чанг; чуқур нафас тортиб,
ффиу! — десанг, учади-кетади!»

У нега болаликдан — бу нидога ўрганди?! Унинг
боболари дарвиш-қаландар бўлишса-чи?!

Одам ўз-ўзингни билмас экансан-да!

Умуман:

Инсон Ҳаётининг гаройиблиги! Шоҳда гадолик,
гадода шоҳлик... Ахир, Искандар дунёдан кетаётib,
тобутдан қулинни чиқармаганмиди?!

Нима қилганда ҳам...

Тоштемир ҳеч қачон:

«Арқонни ўзимиз келтирайликми ёки беришади-
ми?!» —

дейдиган одам —

булмаган, булолмаган,

бундан сўнг ҳам булолмайдиганга

ухшар эди!

* * *

Тоштемир энди ўз ҳаётини

кечаги қарич билан ўлчаёлмаслигини ҳис этарди.

У бир ўлимни кўрган, бошини бир карра сиртмоқ-
қа тутган эди... Аввалги тартибда яшашни энди хоҳла-
мас ҳам эди!

Шунинг баробарида, одамлар кундан-кунга
унинг гарив қулбасига танда солишмоқда,
уни исканжага олишмоқда эди!

Боши қотган эди.

Шундай юриб, бир куни тасодифан
Уста Маҳмуднинг уйи олдидан ўтди.

Ҳаяжон босиб, бехосдан:

*Менга ул ёр керак,
дунё керакмас...*

тўгри —

олдинлар ўзи мол-мулк, аскар йиққан шаҳар таш-
қарисидаги горга қараб кетди.

Борди. Ҳувиллаб ётган горда ёлғиз макон қурди.

Ора-орада шаҳарга келиб, Уста Маҳмуднинг ҳовли-
си теварагида айланар, кейин, яна горга бош олиб
кетар эди.

Отаси вафот этгач, Нигор ҳовлида етим-есир қизчаларни түплаб, уларга отинбibi булган; баъзан ҳовли юзида уларни ййнатиб, баъзан кўчага ҳам олиб чиқар эди.

Тоштемир Нигорни тоҳ очиқ дарвозадан кўрар, тоҳ кўча-кўйда пана-панада туриб, кузатар эди. Болаликда бирга ўсишгани, бир-бирини яхши билишганига қарамай, қизга яқин йуламас, бунга ботинмас эди.

Ажабки, яна Илес (шоир) Тоштемирни «безовта» қила бошлаган эди... У Илесни учратиб, икки оғиз илиқ сўз айтгиси келарди.

Аммо Шоир (*«Бошга тушган бу ҳаётнинг турфа савдоси билан!»*) аллақайси юртларга саёҳат-сафарга кетиб қолган эди. Қачондир қайтадими, йўқми?! — билиб бўлмасди.

Илеснинг шеър-қўшиқлари эса Тоштемир учун «жон риштаси» эди!

Бу қўшиқларни у тун-кун эслар ва...
юрагида «қўшиқ бўлиб» яшай бошлаган —
Нигор тўгрисида ўйлар эди.

Болалик кунларидаги воқеалар:
бир гал баланд супадан бехос йиқилиб тушганида,
Нигор қаёқдандир малҳам топиб, қонаган қўл-оёқларига суркагани; катталардек уни муолажа қилмоқчи
бўлгани...

бошқа сафар улар кўча айланишгани; иккаласи ҳам ҳеч нарсага ақли етмаган бола, лекин бир-бирининг кулинни тутиб, негадир титраб кетишгани... —
барчасини эслар эди.

Нигорнинг энди қалин қошлари, ўтли, ўқтам кўзлари — чиройига Тоштемир лол қолар;

қизни гўзлаб бир сурат ёки
тубида тошлар ялтираб ётган
тиник сувга ўхшатар эди.

У савдои кўйда
таниш уй остонасига бош урар эди.

Тоштемирга бу хонадон олдида гуноҳкор эканлиги маълум эди! Лекин Нигорни кўпдан буён севиб юрганига ҳам энди шубҳаланмас эди. Қизни чўри қилиб уйга бошлаш қаёқда! — унинг ўзи қулга айланган эди.

Тоштемир яшаган гор — яна, гўёки зиндан эди.
Қоронғи. Зах.

Тириклик ҳам — зиндандаги сингари, маҳзун ва мискин.

Бир кўза сув. Бир бурда нон.
Зиндандан кейин, ҳали дор-чи?!

*Қол-қаро зулғингни боғлаб,
бўйнима дор айлама...*

Дор!

Орадан кўп утгани йўқ;
дорга ҳам навбат етди.

Тоштемирга кунлар шундай ўтаверса, аҳён-аҳён
узоқдан Нигорнинг ҳуснини томоша қилса, бас эди.
Шунга ҳам, у — ҳаётдан рози эди!

Бироқ...

унинг теваракда кезишини пайқаб:

*Ёшириб мендан юзингни,
ташнаи дийдор этиб! —*

Нигор арқонни тортди.

Уни қармоқ ташлаяпти, деб гаши келганми?! —
Нигор тўнини тескари кийган, чора кўрган эди!
Доим очиқ эшик — беркилди.

Қизчалар билан Нигор, куча ҳам айланмас эди.

Беш кун...

Ўн кун...

Бир ой...

Икки...

Уч...

Эй Худо!

Бир бандай мўминга озор шунчалар...

Тоштемир ўзини қўйишга жой тополмас эди.
Шаҳарга келиб, туну кун кезар, горга қайтар;

яна шаҳар, яна гор;

Нигордан айру яшай олмаслигини сезар; уртаниб,
тоқатсизланиб,
ўз-ўзини
бурдалар эди.

*Энди бетоқатлигимдин
айлагум чок узра чок,
Аслида, минг пора бўлган —
бу дили афгорни...*

Ахийри, чарчаб,
умидсизланди.
Шаҳарга келмай қўйди.
Форда кўксини ерга бериб ётишга одатланди.

Дунёда Тоштемирни деб куйса куядиган, ўлса уладиган биргина киши — унинг отаси Мулла Тошпўлат эди!

Тоштемир үзининг ҳаёти отаси учун азобга айланганини тушунар эди. Лекин илож қанча! — у ўз-ўзига бу ҳаётни танлаб олмаган эди.

Бахтсиз бўлса ҳам, аҳмоқ бўлса ҳам! — ота ўғлидан кечиши мушкул экан... Уч кун-тўрт кунда бир, бозордан ул-бул харид қилиб, Мулла Тошпўлат горга ўглини кўргани келиб турар эди.

Улар деярли сўзлашибиссан! —
(Бундай дилисиёхликда нимани ҳам гаплашашсан??)

Тоштемир отасига дардини қандай айтишни ҳам билмас эди.

*(Менга ул ёр керак,
дунё керакмас...)*

Аммо
бир куни
Мулла Тошпўлатнинг ўзи гап очди:
— Менинг юким тайёр, бутун бўлмаса, эртага кураман, деб турибман. Мен сендан розиман, болам. Бехос кўришолмай қолсак, сен ҳам рози бўл!

Тоштемир отасининг юз-кўзига қаради.
Эзилди.

— Ундей деманг, дада. Мен сизга бадмехр эмасман. Сизни унугтаним йўқ... Бош олиб кетишга мажбур бўлдим. Бунинг устига, инсон ғам-андух, изтироб учун яратилган эканми?! — юрагим ёниб, тутаб ётибман. Кўз ўнгимда дунё саробга айланиб қолди.

— Бизнинг қисматимиз шу экан, пешонамиз шўр экан, болам. Лекин биз девор ортида туриб, билмаймиз, дунёда енгил қисмат топилмайди, ҳеч кимга осон эмас. Чидаб, шукр қилиш керак! Одамлар қандай яшаса, шундай яшаш керак!

— Мен энди бошқаман, дада. Одамлар ичида

яшаёлмайман... Одамлар ҳалол билан ҳаромни уйла-
майди. Уларга фақат лаззатланиш, завқланиш бўлса!
Ҳазар қани?! Сиз курмайсиз, мен кўриб турибман,
дада, ана, менинг панжаларим орасидан қаранг, гу-
ноҳлардан Ер қорайиб, тўзиб ётиби. Бир ҳовучгина!
Титраяпти... Мен осий бандаман, гуноҳим кўп! Энди
дунёга этак силкидим. Ффу... Дунё қаттиқ меҳр
қўйишга арзимас экан! Бир-бирига зулм қилишдан,
эгрилиқдан асраниб, покланмоқчиман. Ахир, хар нар-
санинг жавоби бор, дада...

— Мен сенга дунёда баҳт тиладим, болам. Қулла-
гим келди... Сенинг гуноҳларинг балки менинг гуно-
ҳимдир?! Худони баъзан унугандирман?! Мунофиқ-
лик йулини тутгандирман?! Ҳаром луқма... Менга қаҳ-
рингни кўрсатяпсанми, Ҳудожон?! Боласидан қайт-
син, дедингми?! Нега мени Уста Маҳмуддек событ қи-
либ яратмадинг?!

— Уста Маҳмудни менга эслатманг, дада... Шун-
дай гап юради. Қуй ўз оёги билан осилади, эчки ўз
оёги билан! Менинг гуноҳларимга ҳеч ким масъуль
эмас! Ўзим... Лекин мен бирорларга ўхшаб яшашим
ҳам шарт эмас! Менга одамлар ўрганган орзу-ҳавас,
дунёда қоладиган зурриётнинг кераги йўқ. Булар ҳам
оддий киshan, занжир экан; мен англадим. Мол-мулк,
безак... бу ҳам ортиқча юқ экан; мен англадим. Не-не
буюклар дунёдан тоқ ўтмаган! Фарид яшамаган! На-
ҳотки, сиз шуларни баҳт деб билсангиз, дада?! Наҳот-
ки, покланишдан катта баҳт...

— Дунёдан юз буриш ҳам гуноҳ, болам. Худо ярат-
ган неъмат... Ўзи айтган! Барча тарки дунё қилса,
дунё нима булади?! Бу рўйи заминда ҳаммамиз ҳам
осий бандалармиз...

— Мен энди олдинги Тоштемир эмасман, дада...
Ффу...

Орага узоқ сукунат чўқди.

— Сен Нигордан ҳам кечдингми?! — дабдурустдан
сўради Мулла Тошпӯлат.

— Мен ундан кечганим йўқ. Лекин энди у ҳам...

— Нега?! Тугадими?!

— У мени кечирмайди.

— Опаларинг бориб, қизнинг опалари билан гап-
лашди. Мен куёвлар билан... Қариндошлар, сўзимиз
бир жойдан чиқди. Энди фақат унинг ўзи.

— Мен истамайман. Фойдаси йўқ.

— Тўғри. Нигор барибир кўнмаслиги мумкин! Бу

қиз отасидан ҳам баттар метин экан! Лекин сен чин ёқтирган бўлсанг...

— Фойдаси йўқ. У кечирмайди, дада. Ўзи учун ҳам, отаси учун ҳам... Қолаверса, бу менга энди муҳим эмасдек! Бирорни, у ҳам жавоб қилисин, деб кўнглингта киритмайсан...

Шундан сўнг,
улар бир неча бора
шу йўсингда
суҳбатлашишди.

Бундай суҳбатлар Мулла Тошпӯлатга нима берди?!

Тоштемир билмасди; лекин унинг ўзи
бор ҳаловатини ҳам йўқотиб,
эсанкирар эди.

Шу кунлар у қайта-қайта —
Нигорга хат ёзил, бутун дардини
очиб-сочишга чоғланди.

Бироқ...

«Мажнун Лайлига мактуб битмоқчи эди. Кейин, уйлади: хаёлинг кўзимда, исминг тилимда, ёдинг кўнглимда! Шундай экан, мен кимга, қаерга ёзай?! Ахир, сенинг ўзинг шу ердасан-ку!»

Тоштемир азобланиб, энди
ҳаётида олдин ҳам бўлганидек, яна
баъзан шуларни
хаёлидан кечиравар эди:

«Дунёга нима учун келдим?! Нега яшаяпман?!
Ҳаётда бирон маъно борми ёки бу номаълум бир насибами?! Мен кимман?! Маконим қаерда?! Қуюндек тентираб, бораётган манзилим қайси?!»

Баъзан эса унинг
умуман, яшагиси келмас эди.
Унга ўлим шарпаси яқин бир ерда кезаётгандек
булиб туюлар эди.
(Яна Илес!)

*Бог аро булбул агар —
гулдин нишоне топмаса,
Овчини курмоқ билан —
ўзни нишон айлар эмиш...*

* * *

Кунлар бир-биридан оғир кечмоқда эди.
Тоштемирни буёги нималар кутмоқда?! — айтиб
бўлмасди.

Ана шунда...

у ажиб бир

туш кўрди.

Уста Маҳмуднинг ҳовлиси эмиш.

Тоштемир дарвоза олдига келган эмиш.

У — кўчаларда судралган қандайдир гадо эмиш.

Яқинлашганида, дарвоза ланг очилибди.

Негадир ҳовли тўла — соchlарини ёзган, қора кийган аёллар.

Улар дод солиб, фарёд чекиб,
кутилмагандар дарвоза томон —

Тоштемир томонга

ёпирилишибди.

Уларнинг важоҳатини куриб,

Тоштемир саросималаниб турганида,
аёллар орасидан, сафни ёриб, —

Нигор чиқиб келибди:

— Ҳайдаманг! Ҳайдаманг!

Шу пайт Нигор билан Тоштемирнинг ёнида —
Шоир Илёс пайдо бўлиб, шеър ўқиб юборибди:

Келдим-у, Илёс,

бу кун остонасига, ул деди:

«Ҳайдаманг!

Бечора ҳар кунги гадойимдир менинг...»

Илёс бу билан кифояланмай, Тоштемирни четга
тортиб, қулогига пичирлабди:

— Дасть ба кор-у, дил ба ёр!

— У нима деганингиз?!

— Билмайсизми?! Юрагида ёр бўлган киши бел
боғлаб туриши, аниқ ишни ҳам қилиши керак! Халқ-
ни ўйлашини гапирадиган кўп. Амалда ўйланг! Отаб-
боболарга ухшаб, минг йиллик обидалар қурмайсиз-
ми?! Дадангиз, Уста Маҳмуд орзу қилган; эришолма-
ган. Нигор ҳам сиздан шуни кутяпти... Шуни... кутяп-
ти...

* * *

Тоштемир уйқудан
кўнгли ёришиб уйғонди.
Фордан ташқарига чиқди.
Офтобга ўзини тутди.
Үша куниёқ, у, атрофни айланиб, баланд бир ер-
дан

иморат учун жой танлади.

Иш бошлади.

Сув очди. Тош йигди.

Тош йўниш, ер қазишга тушди.

Аста-секин...

Аста-секин...

Ёлғиз отнинг чангчи чиқмас! —

бунга унинг ақли етарди... Дунёда ёдгорликки бор,
минг-минглаб қуллар тиклашган. Турли юртлардан
олиб келингган асиrlар! Қонлар. Қурбонлар.

Бир ўзинг чинакам иморат, айниқса, обида қуриб
қолдиришга чоғланиш девоналик, холос...

Аммо Тоштемир бу тұгрида уйлашни истамасди.

У фақат, умримда арзирли бирон иш қилишга ул-
турманми, йүқми, деб ташвишланар, курқар эди.

Нигор энди менинг бу ишимга нима деркин?! Нима
қиларкин?! — деб ҳам безовталанар эди.

Булардан ташқари, кўпинча,

во-дариғ, умримдан кўп вақт бекор — ҳайф кетиб-
ди, инсон дунёда икки марта яшаса экан, янги умри-
ни — хulosи чиқариб, — янгича яшай олса экан, деб
афсус-надомат ҳам чекар эди.

*(Заковат!
Тутилиб қаерда — йўлда,
Менга етиб келдинг
нега бунча кеч?!)*

* * *

Кун.

Тун.

Яна кун.

Яна тун...

Зарра-зарра кўл бўлур! Ёки:
томчилайверса, тош ҳам тешилади.
Нихоят, Тоштемир —

бинонинг пойдеворини биткарди.

Дэвор кутара бошлади.

Бу бино у олдинлар қурган омонат, алфасона иморатлардан эмас.

Бир пайтлар үз ҳовлилари ёнида тиклаган қасри-саройга ҳам ухшамайди. Бошқа!

Демак, меҳнат. Оғир меҳнат.

Фақат устачиликми?! Бу ерларда тош ва сувдан булак вақо йўқ. Атрофдан топиш, ташиш керак!

Яна меҳнат. Оғир меҳнат.

Тоштемирни биргина илинж —

курган туши — ҳаммадан ҳақир, гадо бўлганида,
Нигор унга шафқат қилгани-ю, эшигидан ҳайдамагани —

Одам боласи бажаролмайдиган ишни

амаллаб кетишга ундан эди!

Уни, Нигор менинг бу ишимдан суюнади, мени кечиради, — деган умид —

Ўтга-чўққа ташлаган, пишита бошлаган эди!

У ҳеч қачон Нигорни унуган ҳам,

Нигордан кечган ҳам эмасди...

* * *

*Мудраган юракни
уйғотди оҳу!*

*Нозик қадамларнинг
енгил сабоси.*

*Ҳорғин кузлардаги кўнгил навоси,
Эркин кузлардаги қизлик ҳаёси —
Сингиб томиримга,
қизияпти қон...*

Бу — қандай галаён?!

Бу — қандай исён?!

*Бу қандай баёnsиз,
ҳасратли бир ҳол?!* —

Мен буни үзим ҳам билмайман алҳол.

Билганим:

учди-ю, наздимда, ёҳу! —

*Учқунлар сачратди
кўксимда оҳу.*

* * *

*Бағрим бу кун тұлиб-тұлиб,
Кетдім
Сизга
зор бұлиб.
Йүлінгизда
ёмғир булиб,
Йүлінгизда
қор бұлиб.
Қочтим келди,
қайларгадыр! —
Ұзимча
йиглаб-кулиб,
Қайға борай?! —
қолди, ахир,
Дунға менға
тор бұлиб.
Мен умидли бу оламда
Кетмай
буткүл тұқилиціб —
Эринмасдан,
бір қадамта —
Келсанғиз-чи,
бор бұлиб!*

* * *

Кун.

Тун.

Яна кун.

Яна тун...

Оғир мәҳнат. Қора мәҳнат.

Тоштемір кунида бир ойға, ойда бир йилға қарияттандек әди.

Қорайған. Озған, чүп-устихонга айланған.

Лекін унинг рухи бардам әди.

У үз гуноҳларидан истіғфор қилиб, одамлар ҳайратланадиган, күриб, покланадиган, миннатдор бұладиган ГУЗАЛ бир ОБИДА тикламоқда әди!

Кун.

Тун.

Яна кун.

Яна тун.

Мәҳнат...

(Норасолар оқибат булди расо меҳнат билан!!!)
Тоштемирнинг қўллари акашак ҳолга келган эди.
Чайқалиб юарди.
Сочлари оқарганди.
Кузлари хира тортган, узокдаги нарсани яхши ил-
гай олмас эди.

Унинг тирикчилиги ҳамон ўша-ӯша:
бир кўза сув, бир бурда нон.
Тоштемирга ортиқча нарсанинг
кераги ҳам йўқ эди:

*Менга ул ёр керак,
дунё керакмас...*

5

Ўзинг учун ул, ЕТИМ...

Тоштемир бошдан кечираётган ҳаёт, албатта,
ҳавас қилгулик эмас! — лекин
Мулла Тошпўлатга ҳам
осон тутиб бўлмас эди.
Умуман,
ӯглини деб, энди дунёда
у чекмаган жабру жафо қолмаган эди!
Барча оталар ҳам фарзанди учун минг бора ўлиб-
тириладими?! —

Мулла Тошпўлатнинг — Худо шоҳид! —
шундай —
ҳар қадамда бир
улиб-тирилгани
айни ҳақиқат эди!

Мулла Тошпўлат уч кун-тўрт кун оралаб, бозордан
ул-бул харид қилганча, форга ӯглини кўргани бориб
турар эди... Ӯғли нондан бўлак нарсага қўл теккизмас-
лигини билса ҳамки, бозорда халтани тўлдириб олар,
кейин келтиргани исроф бўлганига ўкириб қолаверар
эди.

У ӯглининг олдида, шаҳар ташқарисидаги форда
яшаб юришга ҳам тайёр эди-ку, узлатга чекинган
Тоштемир хуркиб, номаълум бир ёққа кетиши мум-
кин, деб кўрқарди. Тоштемирга қўшилиб, унинг тар-
ки дунё қилишида ҳам маъно йўқ эди! Бунинг устига,
кимдир чироқ ёқиб, қозон осмаса, ҳовли-жой вайро-

нага айланади... Қандай бўлмасин, Мулла Тошпўлатта оғир эди! Қариганда, уйда ёлгиз гимирлаб, уз кунини кўришга мажбур эди. Кўпинча зерикарди. Үлим ёдига тушиб, мен нимани олиб кетяпман-у, нимани қолдираман, деб безовтала нарди. Зулфизарни эслагани-эслаган. Хотини ҳаёт пайти — дунёда кўрган энг баҳти кунлар бўлиб туюлар эди!

Ушандан буён ўтган давр ичида

Мулла Тошпўлат фақат...

Тоштемир ўлмай дор остидан қайтганида

(Эгри йулдан юрган бўлса ҳам, ўз боланг-да!) —

бир гал — терисига сифмай севинган эди.

Тоштемирнинг оддийроқ яшаши билдираётганини сезиб, дўпписини осмонга отган ҳам эди!

Бироқ —

яна гўёки чил-чил синган шиша! —

ҳаммаси барбод бўлди.

Аввалига

ишлар эски ҳаммом, эски тос қабилида

давом эта бошлади.

Кейин, Тоштемир, кўча чангитишига ўрганди.

Кейин, горга жўнади...

Хонадонда баҳт йўқ; севинч унутилган эди!

Мулла Тошпўлат ақлли одам эди.

Унинг хаёлини (ҳамишаги аҳвол) ўз тақдири эмас,

Тоштемирнинг ташвиши банд этган эди.

У угли олдингидан ўзгаргани, одам турқига кирганини (олдин ҳайвондан фарқ қилмасди!) аллақачон пайқаган; бундан кўнгли ўсган эди.

Сунгти палла

янада кўкси кўтарилиди:

Тоштемир горда могор босиб ётмай, ана,

ота-боболардан қолган касбу-кор билан шуғулланмоқда.

Айниқса, олдинлар эски ёдгорликларни буздирса, энди ўзи ГЎЗАЛ бир ОБИДА тикламоқда!

Мулла Тошпўлат

ўёлига энди нафрат билан қарамасди.

Ўглидан рози эди!

Атрофдаги одамлар ҳам... кимдир Тоштемирни савдоиига ўхшайди, дейиши мумкин! — аммо

Мулла Тошпўлатта ҳеч ким:

«Ўглинг ёвуз! Қонхўр! Нонимизни тужа қиляпти!
Халқни бузяпти!» — демайди. Олдинги таъналар қолиб кетди.

Бу эзгулиқдан күз юмиш — гуноҳ.

Худога шукр!

Лекин —

дунёни тушуниб бўлмас экан! —

ота учун фарзандинг чекига тушган.

ШОҲЛИК ҳам, ГАДОЛИК ҳам

бирдек зулм экан!

Мулла Тошпұлат,

үгли ўз-ўзини қиймалаётгани, ўртаниб, —

эриб-сув бўлаётганини кўриб турар эди.

Тоштемир оғир дард билан оғриган;

шу дард уни олиб кетадиганга

ухшар эди!

Кун.

Тун.

Яна кун.

Яна тун...

Эски чарх бир маромда айланмоқда эди.

«Севинчларда яширин бир ҳазинлик бор!»

Қани, ўша севинчлар?!?

«Изтироблар

ва улардан кейинги севинчлардан иборатдир ҳаёт!»

Қани, ўша севинчлар?!?

Ота-бала ҳаётида севинч йўқ; баҳт унугилган эди!

Мулла Тошпұлат ўғлини ўйлаб — ўғлидан кўпроқ азобланарди.

Унинг кўнгли ачириди.

У боласига ҳамон ёрдам бергиси келарди!

Ҳамон буни эплаёлмаётган эди!

«Тонг-ла қиёматда Зулфизар билан қандай юзлашман?! Нима дейман?!» —

Мулла Тошпұлат шу тўғрида ўйлагани-ўйлаган эди.

У ҳар гал орқага қайтиб, яна қирғоққа бош урган тўлқиндек ҳолатга тушган эди. Юрагида умид уйғониб-уйғонмай сўнар

ва...

янгидан умидланаверар эди!

Тоштемир горда кўксини ерга бериб ётишни бас қилиб, иморат қуришга киришганида, шундай бўлди... Ўғли мащаққатли меҳнатдан чўп-устихонга айланниб, баттар қийналиши, аниқ ҳалокат ёқасига бориб қолишини — Мулла Тошпұлат қаёқдан билсин!

Кейин...

Нигор!

У, Тоштемир бу қизга шайдо эканлигини

таниш қурувчилардан эшилди.

(Болантта тегишли муҳим бир гапни бошқалардан эшитиш оғир экан! Лекин майли...)

Уста Маҳмуднинг ҳовлиси деган қўргонни
қамал қўймоқчи булиб, Мулла Тошпўлат —
келмаган томон қолмади.

Лекин эшиқдан ҳам, бирон тешикдан ҳам кириб,
Нигорни «бўйсундириш»нинг иложи топилмади!

Нигор эримади. Бўрининг еса ҳам оғзи қон, емаса
ҳам! Тоштемирни қиз кечирмади!

Мулла Тошпўлат умидланганидан, Нигорни ўзи
кўндириши мумкиндек оҳангда гапириб, ўғлини ҳар
қачонгидан кўпроқ далли-девонага айлантирганини
пайқади. Ота-бала эзилишгани қолди!

Кейин:

бундай воқеа...

Тоштемир горга бош олиб кетгач,
эски ҳовлини қуллар, чўрилардан тортиб, барча
тарқ этган эди!

Баъзан Мулла Тошпўлатнинг ҳолидан хабар олиб
турган қизлари, невараларидан бўлак...

фақат...

лўлига ўхшаган жингалаксоч, жиккак бир йигит
аҳён-аҳён

ҳовли атрофида уймалашар эди.

Гоҳ-гоҳида ичкарига кириб, Мулла Тошпўлатнинг
ёнида бир оз ўтириб ҳам кетар эди.

У оғзига сув олгандек, деярли индамасди.

Болор санагандек, шифтга, ўргимчак ин қўймаган-
микин, дегандек, бурчак-бурчакка тикилиб, хонадан
секин қайтиб кўчага сиргаларди.

Унинг яна бир қизиқ одати:

хонага кириб-чиқаётганида, остоңада ётган йир-
тиқ-сиртиқ оёқ кийимларига ўйчан қарап, хонада
ўтирганида ҳам, негадир Мулла Тошпўлатнинг маҳси-
си чоклари бўйлаб кўз югуртирасди!

Жиккак йигит бир куни Мулла Тошпўлат ҳузурида
анча узоқ ўтири.

— Йигит! Сен кимсен?! — деб сўради, ниҳоят,
сабри тугаб, Мулла Тошпўлат.

— Менми?! Илес... Этиқдуз!

— Сен, Тоштемирга бирон ишинг бормиди?!

Йигит бошини чайқади.

— Бўлмаса, нега келдинг?!

— Биз бирга зинданда ётган...

- Тоштемир горда...
- Биламан! Қурқиб, бормаёттан эдим. Энди бориб турибман.
- Бу ёққа-чи?! Келишингта сабаб?!
- Менми? Сизга бир гапни айтмоқчи эдим. Лекин хафа бұласизми, хурсандми?!
- Мен хурсанд бұладиган ҳам, хафа бұладиган ҳам нарса қолмаган. Гапиравер! — деди Мулла Тошпұлат.
- Тунов куни гор яқинида юрган эдим. Қарасам, сүқмоқда бир түп йигит... Уста Маҳмудга яқын йигиттар! Бориб, нима гап, деб қызықдым. Биз Янги Дастан тузмоқчимиз, Тоштемир бошлиқ, дейиши. Тоштемирга ёрдам бериш керак, дейиши... Ҳозир уёқда кетаёттан ишни күрсанғиз!

Бунга одам хафа бұлар эканми?!

Аксинча, Мулла Тошпұлатта бу яхши мұжда бұлиб түолди. Тоштемир сал нафас ростлайди, у ишдан бөш кутариб, яшаш тарзи ҳам балки үзгаради, деб умидланди.

Йүк, әртаси куни бориб, күрди...

Тұгри, Уста Маҳмұднинг йигитлари Тоштемирнинг ёнида тер түкишмокда; атроф-борлыққа жон кирган эди!

Бироқ Тоштемир ҳамон (барибир)
үз-үзини үргамоқда, ёнмоқда эди!

Мулла Тошпұлат бу гал ҳам умиди сұниб,
паришонланғанича, уйига қайтди...

ЯНА БОЗОР...

У, албатта, бунинг бари Худодан, деб үйлар эди.

Шу билан бирга, яна бот-бот Ҳайдар Махсумни әслайдиган бұлиб қолған эди.

«Ҳайдар Махсум ёймачи ҳам,
олим ҳам,
девона ҳам,

афсунтар ҳам эмас! У — Ҳаққа ётган авлиә экан!
Үглемни минг турфа савдоларга солған — ўща!» —

деган гап Мулла Тошпұлатнинг
хаёлидан кетмас эди.

Мулла Тошпұлат уйда инқиллаб ўтиrmай,
яна тұгри «ошна»си уйига бораверар эди-ку, наза-
рида,

Ҳайдар Махсум билан ҳисоб-китоб тугаган эди!

У энди яна бозорга қатнайдиган одат чиқарди.
«Ошна»сининг бозорда кўринмаётгани унга аён эди;
излаётган ҳам эмасди...

эски-янги ёймачилар атрофида уймалашиб, уларни
гапга солишга уринмоқда эди. Ҳайдар Махсумдан
бошқа ҳам — бирон киши топилиб қолар!

Мулла Тошпұлат:

«Ақл сотадиган одам йүқмикин?!»— аниқламоқчи
эди.

Душанба куни борди.

Кейин, чоршанба.

Кейин, жумаи муборак.

Кейин,
пайшанба, якшанба кунлари ҳам борди.

Шундай кунлардан бирида

у кутмаган қизиқ воқеа рўй берди...

Аввалига Мулла Тошпұлат, узоқдан
бозорда, дарвоза пинжида тизилган ёймачилар қа-
торида —

куя еган эски пустак устида ўтирган
кимсага қўзи тушиб,
шошиб-довдираб қолди.

Аммо, кейин, яқинлашиб, адашганини сезди;
пустак устидаги бу зот, ажабки, —

бир гал Ҳайдар Махсум тўғрисида «ахборот» бер-
ган —

Эзма ёймачи эди...

Мулла Тошпұлат Эzmани кўпдан буён кўрмаган,
сuriшириб ҳам, тополмаган эди. Бироқ
бошқалардан унинг ҳаёт тарихини эшитган эди...

Бу одамнинг исми Абулфайз;
у бир пайтлар пойтахтда яшар эди.

Отаси жуда бадавлат киши эди.

Ўзи ҳам, хатти-ҳаракати ҳам бесунақай Абулфайз
ёшлигига қандай чиройли бўлганини тасаввур қилиш
қийин. Отаси уни — ундан ҳам кўхли бир қизга
уйлантириб қўйган эди.

Уларнинг уйида тўрт сандиқ китоб бор эди.

У эрка эди. Фақат дўстлари билан гурунг қуриб
юрар ва фақат...

китоб ўқир эди.

Бир куни келиб, унинг отаси қазо қилди.

На дунёда қандай яшаш кераклигини, на ишнинг
күзини биларди. Саккиз кунда
отасининг мол-мулкини елга совурди.
Шундан кейин, нозанин хотини уйда қолган-қутга-
нини «супуриб» кетди...

Чинми, ҳазиллашибми, вақтида Сукрот:

«Ҳеч иккиланмай уйланавур. Хотининг яхши чиқ-
са, баҳтли бўласан. Ёмон чиқса — файласуф!» — де-
ган экан.

Абулфайз биринчи хотинидан ажраб,
файласуф бўтмаганидек,
энди камбағал бир қизга уйланиб, барибир
баҳтли ҳам бўла олмади.

Рўзгор тебратиш, нон топиш керак эди!

У пойтахтдан қариндошларини «қора»лаб —
унут бир вилоятдаги унут бир шаҳарга кўчиб кел-
ди.

Лекин қариндошларидан «ис» чиқмади.

Ҳар хил иш билан ҳам шугулланиб кўрди, —
натижка бўлмади.

Абулфайзга отасидан қолган тўрт сандик китоб
жонидан азиз эди! Ичак қулдираб тургач...

Бозорга йўл солиб, ёймачиликка ўтди.

(Шу, китоб сотганида, у Ҳайдар Махсум билан
гоҳ-гоҳида дардлашган эди!)

Китоблар ҳам соб бўлди.

Абулфайз ўзи билан хотини устидан бошқа —
уйда борини бозорга ташиб, сотишга одатланди...

Камбағаллик айб эмас, дейишади.

Бу гап дунёда очлик, муҳтоҗликни кўрмаган одам-
лардан чиққан!

Юрган йўлингда оч ва ноилож қолищдан шарман-
да нарса йўқ!

Саёҳат пайти оч қолиб, икки одамдан бирининг
кўзига иккинчиси товуқ бўлиб кўрина бошлаган
экан...

Ночор қолиб, баргдан кўйлак-иштон тиккан, хи-
вичдан пойабзал тўқиган одамлар озми?!

Мана, энди...

Мулла Тошпӯлатни ажаблантириб, —

Абулфайз негадир Ҳайдар Махсумга «ўхшаб ўти-
риши»ни

ўзига касб қилган эди!

Мулла Тошпӯлат

Абулфайз (Эзма ёймачи)га бехос рўпара келгач, —
сал ўпкасини босиб,
қўшқуллаб кўришди.

Кейин,

сабр-тоқати етмай,

Ҳайдар Махсумга илк бора юзлашганида бўлгани-
дек:

— Узр, албатта, биродар... Нега бозорда бундай
утирибсиз?! Нима сотяпсиз?! — деб суради.

Минг Ҳайдар Махсумдек қўр түкиб,
жиддий, кибор қиёфага киргани билан, Абул-
файз —

Ҳайдар Махсум эмас! Буни ҳис этганиданми?! —
ўзини торозига солмади.

— Ақлимни сотаман! — деди дарҳол.

Мулла Тошпӯлат неча кундирки, бозор айланиб,
«ақл сотадиган одам»ни излаётгани-ю, таниш ёймачи-
ни учраттганидан мамнун эканлигига қарамай, —

шу аснода дўпписини осмонга отиб, иргишламади!
Энсаси қотган, ҳафсаласиз бир кўйга тушган эди!

— Мен уни қандай оламан?! — деб қизиқсинди,
барибир.

— Ҳаммаси ёзиб қўйилган! — деди ёймачи, этаги
остида ётган бир уюм учбурчак хатни кўрсатиб. Бу
етмагандек (Эзма-да! Чидайсиз!) тушунтириди. — Бў-
лак-бўлак сотяпман! Арzon. Ўн тангадан...

— Бўлти. Бир қисим беринг, — деди Мулла Тош-
пӯлат.

У бозордан чиққанича, тепаликка кўтариластиб, —
йўлдаги ўтиб кетаётган болага хатларни ўқитди.

Абулфайз бекорчиликдан хаёлига келган ҳар бало-
ни қофозга тиркаган эди!

Масалан:

«Уйингизда сичқон кўпайиб кетган бўлса, думидан
тутиб, беш марта срга уринг. Кейин, устига озгина
кул сепиб қўйсангиз, улади».

«Емон қушни билан дарвозанингизни ёнма-ён кур-
манг».

«Хотинингиз эгри йўлдан юрмасин десантгиз, бир
оғсига ип боғлаб қўйинг. Еки, янги уйланганда,
ялангоёқ ҳовли атрофида уч марта югуртиринг».

«Муаллими аҳмоқ бўлса, болангизни мактабини бошқа қилинг».

Бу барчаси алмой-алжойи гаплар эканлигидан,
Мулла Тошпӯлат кўчадаёқ хатларни йиртиб,
ташлаб кетди.

У бир неча кун Абулфайзни эслаб юрди.

Яна кўришмоқчи эди! Ёймачининг:

«Сотадиган бундай бутунроқ ақли борми?! Еки,
чўнтағидек калласи ҳам қуп-қуруқми?!» — билишни ис-
тар эди.

Аммо кўчада бир куни тасодифан...

тўрт-беш йигит йўлини пойлаб, Абулфайзни аёвсиз
дўппослашаётганининг гувоҳи бўлди.

Мулла Тошпӯлат тушунди...

Дунёда ақл сотиш ҳар кимнинг ҳам қўлидан кела-
вермас экан!

Буниси майли.

Пустак устида ўтирган зотнинг ҳаммаси —

Авлиё бўлавермас экан!

Хуллас,

Мулла Тошпӯлатга Ҳайдар Махсумга ўхшаган
одамни вақтида Ҳудо

бир карра йулиқтирган экан!

Ахийри...

Мулла Тошпӯлат

чор-ночор

Магриб томонга, шаҳар этагига қараб юрди.

АВЛИЕ...

У узоқ йўл юриб, қоқиниб-суриниб,
тубида шағиллаб сув оқаётган жар бўйидаги пачоқ
ҳовлига етиб келди.

Бу гал Ҳайдар Махсумга нақ дарвоза олдида юз-
лашди.

— Қани, ичкарига. Тортинг! — деди Ҳайдар Мах-
сум Мулла Тошпӯлат билан қўли учини бериб, кўри-
шаркан.

«Ошна»си дийдорини яна кўрганидан суюниб-ҳая-
жонланган Мулла Тошпӯлат, унинг чўккан, ориқ сл-
каларига тикилиб, изидан босди.

Бу ерда ҳамма нарса эски ҳолида эди:
биргина деразасига бўйра парда осилган нимқо-

ронги даҳлиз; тўртта пўстак ташлаб, уртада яланг хонтахта турган хона...

Улар пўстакка келиб қунишгач, —

кузлари порлаган, новча бир ўсмири (Ҳайдар Махсумнинг невараиси бўлса керак!) дастурхон ёзиб,
икки коса сув, битта қотган нон келтирди.

(Сув билан нон шу паллада Мулла Тошпўлатга Тоштемирни эслатди!)

— Уйда бори. Ош бўлсин; дастурхонга қаранг, —
деди Ҳайдар Махсум.

Мулла Тошпўлат нонни ивитиб еди. Сув ичди.

Нихоят, «ошна»си билан сухбатлашишга чоғланди.

— Тинч юрибсизми, биродар?! Кун утятими?! —
деди Мулла Тошпўлат. — Аҳволлар қалай?! Соғлиқ
қалай?!

— Рух йўқ, ҳол йўқ, — деди Ҳайдар Махсум. —
Баъзан дунёда юриш ҳам ёқмай қолар экан...

— Сиз ҳали бардамсиз! Менинг аҳволим чатоқ.
Бугун бўлмаса, эртага ўламан, деб турибман... Омонатни топшириш фарз! Лекин ўғлимдан кўнглим тинч
эмас. Дунёдан куйиб ўтадиганга ўхтайман...

— Нима, ўғлингизга ҳалиям эс кирмадими?! Углингиз ақлли бўлмадими?! — қизиқсинди Ҳайдар
Махсум.

— Ўғлим яхши... Одам булиб қолди! Бу борада
шикоят қилмайман... Лекин тоғдай йигит мум бўлиб
эрияпти! Курсангиз, эшикдан тушган бир кесим нур,
дайсиз... Зигирдек ёмонликка тоқати йўқ. Ҳаётдан қўл
тортган. Жуда гариб булиб қолган...

Ҳайдар Махсум бир оз паришонланди.

— Инсон қисмати шу! — деди Мулла Тошпўлатга
у ғамгин қараб. — Эзгулиқдан қайтиб, ёвузга айланади!
Ёки, ёвузликни инкор қилиб, эзгулиқка етиб кела-
ди! Учинчи йўл йўқ! Излаган билан ҳеч нарса чиқ-
майди. Азалдан шундай...

Бу жавобни олишини Мулла Тошпўлат аниқ бил-
маса ҳамки, кўнглининг аллабурчида ҳис этган эди!
Ақлнинг ё у, ё бу ярми — сенинг насибанг! Яшайсан!
Бошқа илож қанча!

Бунга тушунмаса, Мулла Тошпўлат, шошиб, алла-
қачон «ошна»сига учрамасмиди?!

Шунга қарамасдан, ҳозир юраги тарс ёриладиган-
дек кўйга тушди.

— Ақалли, фойдали бир маслаҳат! — деб пицирла-
ди у эзилиб. — Мен-ку, кетаман; болам баҳтсиз! Ишо-

нинг! Мен уқимаганман; сиз олимсиз. Ҳар нарса қулидан келадиган авлиёсиз... ёрдам беринг! Сиз ақлингизни сотиб бўлгансиз. Биламан! Лекин дўкондорлар ҳам пештахта остига бир нарса ташлаб қўяди...

Мулла Тошпўлат қўйнига қулини тикди.

Бироқ шу пайт Ҳайдар Маҳсумнинг ранги оқариб, лаблари гезарди.

— Ҳақ гапни айтайми?! — Мулла Тошпўлатнинг кўзига тик боқди «ошна»си. — Мен афсунгар ҳам, авлиё ҳам эмасман! Оз-моз илмим бор; унинг ҳам фойдаси йўқ... Бешта қиз чиқардим; узи бўлмас экан! Менинг ақлим ҳам... ҳаминқадар! Үғлингизга дуодан нимадир тегиб, нимадир мос келгани — тасодиф. Худонинг иродаси! Балки, Худо менинг ноламни эшитгандир?! Биз гариблармиз, гадолармиз! Бу дунёда таги-полармиз! Ҳеч қачон қосаси оқармаган... Ахир, ўйламайсизми, ақлим иш берса, мен шунчалик қашшоқ яшармидим?! Ўзимга эн бўлолмаган сизга буй бўламанми?!

Мулла Тошпўлат қулини қўйнига тиққанича, қотиб қолган эди.

Ҳайдар Маҳсум ақлли одам эди. Тұғрисини айтган эди!

Лекин Мулла Тошпўлат ҳам ақлли одам эди. Ишонмади!

«Бу дунёда дардкаш-бенаво кўп эканлигини у билмалтими?! Унинг узи отлиқ эмас, пиёда. Фуқаро! Халқнинг ичида юрибди! Гапириш шарт эканми?!»

Мулла Тошпўлат жуда хафа бўлиб кетди.

У, менга «ошнам» энди яхшилик қилгиси келмаяпти, негадир қизғаняпти, деб ўлади.

Яқин кишингдан озор чекиб-ўпкалангандек: «Шуна-қа экан-да! Майли! Майли!»— деганча ўрнидан туриб, кексалигини ҳам унутган шиддатли бир ҳолатда Ҳайдар Маҳсумнинг уйини тарк этди...

6

ЯНА МУЛЛА ТОШПУЛАТ...

Дунёда Худонинг имтиҳони кўп.
Биттаси — кексалик бўлса,
иккинчиси — кексайганда ёлғиз қолиш!
Учинчиси ҳам бор.

Буниси — шундай пайтда оғир тортиб,
ётіб қолиш!

Худо күрсатмасин, бехосдан үлиб кетсанг, —
ұлтанингни бирор билмаслігі ҳам мумкин...

Хүп, Мулла Тошпұлатдан үғли узоқда юрибдими,
юраверсин; қызлари, күевлари, неваралари-чи?! Улар
хабар олиб туришади. Аммо, бұлак турғандан кейин,
сенга бирор посбонлик қила олмас экан! Бунинг усти-
га, дадамиз ҳали бақувват, беш-ун йил яшайдилар,
деб үйлашади. Мулла Тошпұлатнинг юраги түкилиб-
битганини билишмайди!

Қисқаси, Мулла Тошпұлат уйда уч-түрт кун үлади-
ган булыб өтди. (Үзича, ана кетаман-мана кетаман,
деган ҳолда эди!) Кейин...

бір куни дарди енгіллашды.

Бу — унга шамнинг сүниш олдидан лопиллаши
булыб туюлди. Үглем билан — бориб, үзим видолаш-
масам, у бехабар қолади, деб үйлаб,
үйдан күчага чиқди.

Шаҳар ташқарисига йўл олди. Ҳоли йўқлигидан,
тухтаб-тўхтаб, бораверди.

Бир тўхтаганида, бошини кутариб қаради:
форга яқинлашган эди.

Эътибор берди:

қурилаётган обида нақ осмонга үрлабди!

Яна бир оз юргач;
обида ёнида Уста Маҳмуднинг йигитлари
куйманишаётганига кўзи тушди.

Кейин:

сайҳонликда бир неча қизалоқ капалак қувиб юр-
гани,

негадир этикдўз Илес улар билан бирга
сакраб-ўйноклаётганини кўрди.

Шу пайт...

пайқади:

гор олдидаги катта бир тош устида

Тоштемир билан...

Нигор! —

ёнма-ён, бошларини этганча,
сўзлашиб

ӯтиришар эди.

У ажабланди. Сўнг, хаёлидан кечди:

«Нигорни бу еққа манови Илес олиб келганга ўх-
шайди! Тоштемир баъзан Илес, деб гапиргувчи эди.
Шу Илес бўлса керак-да!»

Унинг яна хаёлидан кечди:

«Дунеда ўз ҳаётидан кўпроқ бошқанинг ҳаёти, ўз баҳтидан кўпроқ бошқанинг баҳтини уйлайдиган одамлар бор! Яратганингга шукр, Худойим!»

Мулла Тошпӯлат БУ ЕРДА ҳеч кимга халал бергиси келмади.

У ўғли, ўғли туфайли ўз аҳволидан қаноат туйиб, орқага бурилди ва...

тўгри Магриб томонга қараб кетди.

...«Ошна»си (ёймачими, олимми, девонами, афсунгарми, авлиёми) ким?! — Мулла Тошпӯлат ҳамон билмас эди. Бу — уни энди
қизиқтирмаётган ҳам эди!

...Ҳайдар Махсумнинг невараси келтирган сув билан қотган нонни паққос туширгач, —

у қўйнидан бир ҳовуч танга чиқариб, хонтахта устига ташлади:

— Сизга барибир раҳмат, биродар! Буни олиб қўйинг. Мен энди яқин орада улмайдиганга ўхшайман! Ишлар шунаقا булиб қолди...

Мулла Тошпӯлат ақлли одам эди. Тўгрисини айтди!

Лекин Ҳайдар Махсум ҳам ақлли одам эди. Мулла Тошпӯлатнинг «дарди»га тушунди!

1993-1995 йиллар